

Gwada ta sabi da Yuhwana

Yesu Kristi ná, gwada Lazglafta ya

¹ Daga tãntã mamu gwada*. Kawadaga tsa gwada ya nda Lazglafta. Tsa gwada ya ta nzakway ka Lazglafta.

² Daga tãntã, kawadaga tsa gwada ya nda Lazglafta.

³ Nda tsatsi magafta Lazglafta ta inda skwiha. Had skwi magaf Lazglafta kul had tsatsi wa.

⁴ Ma tsatsi zlafta hafu. Tsa hafu ya ta nzakway ka tsuwadaka mnduha.

⁵ Tsa tsuwadaka ya ta tsuwadaku ma grusl, walaŋ a grusl ta ksaf ta dekdek wa.

⁶ Ka zlagaptã sana mndu ta hgã lu ka Yuhwana ghunaf Lazglafta.

⁷ Ka sagha tsi ŋa nzaku ka maslãmtsãka tsuwadaka, kada zlglafta inda mnduha nda ma tsatsi.

⁸ Tsatsi a tsa tsuwadaka ya wu, zlagap ŋa ga maslãmtsãka tsuwadaka tsatsi.

⁹ Tsa tsuwadaka ya ná, vãrdã tsuwadaka ya. Ma saghani ta ghãŋa hadik ka tsuwadaka tsi ta mnda sãla.

¹⁰ Tsaw tsa gwada ya ná, nda ghada nzakwani ma ghãŋa hadik, kabga nda tsatsi magafta lu ta ghãŋa hadik. Nziya nza tsi tsatsaf a mnduha wa.

¹¹ Saghani da mnduha, ka kwalaghuta mnduha ta tsu'af ta.

* **1:1** Ngha ta aya 14.

¹² Lagha gwal ta tsu'aftha, ka zlgħaftá hgani. Nǎ tsahaya, ka vlanťá tsi ta hǎŋ ta mbrakwa nzaku ka zwana Lazglafta.

¹³ Nza a hǎŋ ka zwanani manda ya ta yagata mnda sǎla, manda ya ta kumǎ mndu a wu, ama sagha da Lazglafta manda ya ta kumǎ tsatsi.

¹⁴ Tsa gwada mnǎ lu ya kay ná, ka mbǎdavaftá tsi ka mndu, ka nzata mataba mu. Nda ndǎgha nda zǎkatahudi, nda kahwathwata. Nda ngha mu ta glakwani, glakwa zwan turtuktuk ghunaf Da ya. Zǎkatahudani nda kahwathwatani katakata ya.

¹⁵ Ka gwadatá Yuhwana ta nzakway ka maslǎmtsǎkani banluwa. «Wana tsa mndu mnǎ yu kazlay: Tsa mndu ta sagha nda hula da ya ná, malaghumala ta i'i, kabga mamu tsatsi ma kǎku lu ka yatá i'i kǎ'a ya kay.»

¹⁶ Dagala zǎkatahudani katakata, tfamaghatfa ta wi demdem, ta gdagda ta vlamatá zǎkatahudani.

¹⁷ Nda ma dzva Musa vlata Lazglafta ta zlahu, ka sagha zǎkatahudi nda kahwathwata nda da Yesu Kristi.

¹⁸ Haf mndu ta kdǎ walanťá nghanťá Lazglafta wa. Tsa zwan turtuktuk ya ta nzakway ka Lazglafta, ta nzaku ma ghuva Da ya, tsatsi ta mnantá nzakwa Lazglafta.

Gwada Yuhwana

Mat 3:1-12, Mak 1:1-8, Luk 3:1-18

¹⁹ Wya gwada mna Yuhwana ma ghunadaghata gwal dagaladagala ma la Yahuda ma Ursalima ta gwal dra skwi ŋa Lazglafta, nda la Levi. Ka lagha hǎŋ da dawantá da tsi: «Wa kagha na?» ka hǎŋ.

²⁰ Ka mnatá Yuhwana ta kahwathwata, manana a ta həŋ wa. «Kristi a i'i wu,» ka'a klinistá ghəŋani ta həŋ.

²¹ «Tsa wa kagha 6a? Iliya ka rki?» ka həŋ nda tsi. «Vani a i'i wu,» ka Yuhwana nda həŋ. «Anabi ka rki?» «Vani a i'i wa.»

²² «Wa kagha ka ŋni dza'azlay nda gwal ta ghunagaŋnaghata 6a? Wa i'i ka va kagha na?» ka həŋ nda tsi kay guli.

²³ «I'i ná,
“Iwi ta gugudaku ma mtak yu,
lele'anawa tvi ŋa mgham[†]”» ka'a nda həŋ,
manda ya mnə anabi Isaya.

²⁴ Mataba tsa mnduha ghunadap lu da Yuhwana ya, mamu la Farisa.

²⁵ Ka dawglanťá həŋ da Yuhwana, «Wana Kristi a i'i wu ka ka, ta Iliya a yu wu ka ka, anabi a yu wu ka ka guli, ŋaw ta maga ka ta batem 6a?» ka həŋ nda tsi.

²⁶ «I'i ná, nda imi ta magə yu ta batem. Mamu sana mndu mataba ghuni kul snanťá kuni. Tsatsi ta sagha nda hula 6a.

²⁷ Ra a yu ka plaptá zu'a 6a6ahani wu,» ka'a nda həŋ.

²⁸ Ma Betani maguta tsa skwiha ya, ta 6la ghwa Zurdeŋ, ma vla magay Yuhwana ta batem.

Yesu Kristi ná, Zwanja Lazglafta ya

²⁹ Gamahtsimani ka nghə Yuhwana ta Yesu ta sagha da tsi. «Wana zwanja tuwaka Lazglafta ta klaghutá dmakwa mnduha.

[†] 1:23 Ngha ta Isaya 40:3.

³⁰ Tsatsi tsa mndu mnə yu kazlay: Mamu sana mndu ta sagha nda hula da ta malaghutá i'i, mamu tsatsi ma kdə lu ka yatá i'i kə'a ya kay.

³¹ I'i guli ná, si sna a yu kazlay: Tsatsi ya kə'a wa. Nana saghasagha yu da maga batem ma imi na ná, ɲa snanamtá la Isra'ila nzakwani,» ka'a.

³² Ka Yuhwana guli mantša: «Nda ngha yu ta Sulkum ta saha daga ta luwa manda ghərbu', ka nzafta tida.

³³ Si sna a yu kazlay: Tsatsi ya kə'a wu, ka mnihatá Lazglafta ta ghunaftá i'i ɲa maga batem ma imi ya kazlay: Tsa mndu dza'a nghanɲa ka ta saha Sulkum ka nzafta tida ya, tsatsi ta dza'a maga batem nda Sulkum nda ghuḅa, ka'a.

³⁴ Ka nghanɲá yu manda va tsaya. Nana mndu na ná, Zwaɲa Lazglafta ya, ka yu ta ghəɲani.»

Taɲtaɲa duhwalha Yesu

³⁵ Gamahtsimani, ka vradaghata Yuhwana kawadaga nda gwal his mataba duhwalhani da va tsa vli ya.

³⁶ Nghayni ta Yesu ta labə mantša: «Wa a zwaɲa tuwaka Lazglafta,» ka'a.

³⁷ Snaɲta tsa duhwalha his ya ta tsa gwaḁa Yuhwana ya, ka laghu həɲ mista Yesu.

³⁸ Kə'a ka Yesu mbəḁavata, ta nghə tsi ná, ta dza'a mistani həɲ. «Nu ta zbə kuni ḅa?» ka'a nda həɲ. «Maləma ḁa! Ga ta nzakwa ka na?» ka həɲ nda tsi.

³⁹ «Saghawasa ka nghanata kuni ḅa!» ka'a nda həɲ. Ka laghu həɲ mistani, ka nghanatá həɲ ta vla nzakwani. Ta fitik hawu ta nzemndi fwaḁ vli nda tsa. Ka kdɲntá həɲ ta vaghay kawadaga nda tsi.

⁴⁰ Mataba tsa mnduha his ta snan̄tá gwada Yuhwana ka laghu mista Yesu ya ná, tekw Andre ta nzakway ka zwan̄amani ma Simun̄ Piyer.

⁴¹ Tin̄əl ɲa zwan̄amani Simun̄ sli'afta tsi ka laghwi da mnay. Ka'a mantsa: «Slafsla ɲni ta Almasihu,» ka'a. Tsaya ta nzakway ka «Kristi.»

⁴² Ka kladaghatá tsi da Yesu, na ghur nghan̄ta Yesu, ka'a nda tsi mantsa: «Simun̄! Zwan̄a Yuhwana ka, Kefas dza'a hga lu ta kagha,» manda mnay kazlay: Pala kə'a ya.

⁴³ Gamahtsimani, dza'a da Galili yu, ka Yesu. Ka guyatá tsi nda Filip, «mbada mista dá,» ka'a nda tsi.

⁴⁴ Tsa Filip ya ná, mnda luwa Betsayda luwa i Andre nda Piyer ya.

⁴⁵ Tahula tsa, ka guyatá Filip nda Natanayel guli. «Slanaghasla ɲni ta tsa mndu vindaf Musa ta gwada ta ghəɲani ma deftera zlahu nda ya ta mnə la anabi ta gwada ta ghəɲani ya kay. Yesu zwan̄a Yusufu mnda la Nazaret ya,» ka'a nda tsi.

⁴⁶ «Mndərga wati skwi ya dīna dza'a sabi ma luwa Nazaret na?» ka Natanayel nda tsi. «Sawi ka nghanata ka 6a!» ka Filip. Ka sli'aftá tsi ka lagha.

⁴⁷ Nghay Yesu ta laghani, «wana vərda mnda la Isra'ila kul had sana skwi ɲa tsanavata,» ka Yesu nda Natanayel.

⁴⁸ «Ga snan̄ta ka ta i'i na?» ka Natanayel nda tsi. «A'a! Ngha a yu ta kagha ta nzaku mista ghuraf ma kdə Filip ka hga kagha ya ra!» ka Yesu nda tsi.

⁴⁹ «Maləma dá! Kagha ná, Zwan̄a Lazglafta ka, mghama la Isra'ila ka,» ka Natanayel nda Yesu.

⁵⁰ «Zlray kagha ta zlghay tsa 6a, kabga mnay dá kazlay: Nda ngha yu ta kagha mista ghuraf kə'a?

dza'a nda ngha ka ta skwiha ta malaghutá tsaya,» ka Yesu nda tsi.

⁵¹ Ka Yesu sganaghata mantsa: «Kahwathwata ka yu ta mnaghunata, dza'a nda ngha kuni ta gunatá luwa buwanj ɲa ɲla duhwalha Lazglafta, ɲa saha tanj ta ghəɲa Zwanja mndu,» ka'a.

2

Kla makwa ma Kana

¹ Ta mahkəna fitik, ka slatá skala kla makwa ma luwa Kana ta hadika Galili. Tsaw laghala mani ma Yesu da tsa vla skala kla makwa ya.

² Hgadagha hga lu ta i Yesu nda duhwalhani guli da tsa vla skala kla makwa ya.

³ Ka kdutá ima inabi. Ka mani nda Yesu mantsa: «Nda kda ima inabi da həɲ,» ka'a.

⁴ «Nahgani ɲa gha nda i'i katək ní a ma! Ta maga a fitika da wu,» ka Yesu nda tsi.

⁵ «Ka maga kuni ta inda skwi dza'a mnaghunata tsi,» ka mani ma Yesu nda kwalvaha.

⁶ Tsaw ma tsa vli ya, mamu wudaha tsatsaf lu nda palaha ta za litir tghas mbsak tghas mbsak sanlaha, dərmək nda hisambsak hisambsak sanlaha, ta kəl la Yahuda ka ghuḅa səlaha tanj.

⁷ «Ndaghanafwa ndagha ta ya wudaha ya nda imi,» ka Yesu nda həɲ. Ka ndaghanaftá həɲ te'te'.

⁸ «Ndana tama, tanjwatá ta mndu ta wa skwa zay,» ka Yesu nda həɲ, ka tanjtá həɲ.

⁹ Tapanata tsa mndu ta wa skwa zay ya ta tsa imi mbədanaf lu ka ima inabi ya ná, zdakwa skwi a va tsa wu, sna a guli ka sagha ga tsa ima inabi ya wa. Taghəɲa tsa gwal ta zakamtá tsa imi yeya nda sna. Ka hganjtá tsi ta zə'ala makwa.

¹⁰ Ka'a nda tsi mantsa: «Tiñəl ima inabi ya zďa ta dgə lu ŋa mnduha, kada vla ya leghlegha tahula baghuta taŋ ná, ka laghwa kagha difanatá ya zďa, ka zlra klagapta ndana?» ka'a nda tsi.

¹¹ Tsaya taŋtaŋa mazəməzəmə maga Yesu ma luwa Kana ta hadika Galili. Mantsa ya maraŋta tsi ta glakwani. Ka faftá duhwalhani ta ghəŋ tida.

¹² Tahula tsa, ka sli'aftá tsi ka lagha da luwa Kafarnahum kawadaga nda i mani nda zwanamani, nda duhwalhani tani, ka zatá həŋ ta fitik tsəbakw hada.

Ghazlay Yesu ta gwal ta dzawa skwi ma həga Lazglafta

Mat 21:12-13, Mak 11:15-17, Luk 19:45-46

¹³ Ndusagaghata fitika skalay la Yahuda ta Pak, ka lafi Yesu da Ursalima.

¹⁴ Bhadaghatani, ka lamə tsi da daďa həga Lazglafta ka slanaghatá tsi ta mnduha ta dzawa slaha nda tuwakha, nda ghərbu'ha, nda gwal mbada tsemi ta nzaku tavata tabəla taŋ hada.

¹⁵ Ka klaftá tsi ta t6aŋ ŋa krupi, ka ghzlagaptá tsi ta mnduha demdem ma tsa daďa həga Lazglafta ya, nda tuwakha tani, nda slaha tani. Ka wut-sidiŋtá tsi ta tsemi gwal mbədu, ka zlambiđiŋtá tabəla taŋ. ¹⁶ «Hliŋwa na skwiha na hadna, ma niŋ kuni ta həga Da da ka həga mbəda dzvu,» ka'a nda gwal dzawa ghərbu'ha.

¹⁷ Ka havaktá duhwalhani ta skwi ya nda vinda ma gwada Lazglafta tazlay: «Dvafďva* yu ta həga gha, manda vu ta dra tsi ta i'i,» ka'a ya

* **2:17** Ngha ta Zabura 69:10.

18 «Mndərga wati ma mazəmzəm dza'a ka mag-ata, ɲa marantá skwi kəl ka ka maga mndəra skwi mandana na?» ka la Yahuda zlraftá gwada nda tsi.

19 «Tasiɲwatasa ta na həga Lazglafta na, dza'a bəglafba yu ma fitik hkən,» ka Yesu nda həɲ.

20 «Ta skwi vaku fwaɗ mbsak mku' mida za lu ta ba na həga Lazglafta na ná, ma fitik hkən dza'a bafta yu ri wa kə'a?» ka la Yahuda nda tsi.

21 Tsaw tsa həga ta gwadə Yesu ya ná, ta gwadə ta ghəɲa ghəɲani tsatsi.

22 Tsaya kəl duhwalhani tahula sli'agaptani ma mtaku, ka havaktá skwi ya mna tsi. Ka zlghaftá həɲ ta skwi ya nda vinda ma gwada Lazglafta, nda gwada Yesu ta mnata tani.

Nda sna Yesu ta skwi ma ɲudufa mnduha

23 Ma fitika nzakwa Yesu ma Ursalima ta skala Pak, nda ndəgha gwal ta zlghafta nghər həɲ ta mazəmzəmha ta magə tsi.

24 Lamə a tsaya da fəlma Yesu wu, kabga nda sna ta həɲ tsidid.

25 Psa a ta mnanata mndu ta gwada ta ghəɲa nzakwa sana mndu wu, kabga nda sna tsatsi ta skwi ma ɲudufa mndu.

3

I Yesu nda Nikwademu

1 Mamu sana mndu mataba la Farisa ta hgə lu ka Nikwademu tekw mataba gwal dagaladagala mataba la Yahuda.

2 Ka sli'aftá tsi nda rvidik ka lagha slanaghatá Yesu. Ka'a nda tsi mantša: «Maləma dá! Nda sna ɲni kazlay: Mnda tagha skwi ta saha daga da Lazglafta kagha kə'a, kabga had mndu ta laviɲtá

maga tsa mazəməzəmhə ta magə kaghə ya, ka had Lazglafta kawadaga nda tsi wu,» ka'a.

³ «Kahwathwata ka yu ta mnaghata, ka ya a lu ta mndu ka mahis wu katsi, laviŋ a ta nghanṭá ga mghama Lazglafta wu,» ka Yesu nda tsi.

⁴ «Waka lu dza'a yəglagatá mndu nda ghada halatani, dza'a vrəgladaf vra da huḍa mani, ŋa yəglagata ra?» ka Nikwademu nda tsi.

⁵ Ka Yesu mantša: «Kahwathwata ka yu ta mnaghata, ka ya a lu ta mndu nda imi nda Sulkum wu katsi, laviŋ a ta walanṭá lami da ga mghama Lazglafta wa.

⁶ Ya yaga mndu ná, mnda səla tsaya. Ya yaga Sulkum ya ná, ŋa Sulkum tsa ya.

⁷ Ma ndərmim ka nda ndərmima kabga mnaghata ḍa: "Tkwe' ka yagatá kaghuni ka mahis" kə'a.

⁸ Nda ta tvi ta kumə tsi ta vyakwa falak. Ta snay ka ta ghudzagani, sna a ka ka ga sli'afṭa tsi wu, sna a ka ka ga ta dza'a tsi wa. Mantša ya nzakwa inda mndu yaga lu ma Sulkum,» ka Yesu nda tsi.

⁹ «Waka skwi mantša dza'a magaku?» ka Nikwademu nda tsi.

¹⁰ Ka Yesu nda tsi mantša: «Kagha mndu ta tagha skwi ŋa la Isra'ila ná, sna a ka ta tsa ra?

¹¹ Kahwathwata ka yu ta mnaghata, skwi snan ŋni ta mnə ŋni, skwi nghan ira ŋni ta gwadə ŋni, tsaw tsu'a a kuni ta skwi ta mnə ŋni wa.

¹² Gwadəy ḍa ta skwi ta magaku ta hadik ŋa ghuni, zlgħa a kuni wu, waka kuni dza'a zlgħaftá skwi ta magaku ta luwa dza'a mnaghunata yu tama?

¹³ Had mndu ta kdə lafi ta luwa, ka mndu ta saha

daga ta luwa a tsi wa. Ba Zwanja mndu yeya ta saha daga ta luwa.

¹⁴ Manda va ya kapadaf Musa ta nahadika ghuvatili ta udzu ma mtak ya, manda va tsaya dza'a kapadafta lu ta Zwanja mndu,

¹⁵ kada mutsafta dar wa ta zlghafta hafu na kdekeden.

¹⁶ «Dvudva Lazglafta ta ghana hadik, kel tsi ka vlatá Zwanjani turtuktuk, dar wa ta zlghafta, zwaduta a wu, mutsafmutsa ta hafu na kdekeden.

¹⁷ Ghunaga a Lazglafta ta zwanjani na tsanaghatá guma ta mnduha ta ghana hadik wu, ama na mutsafta mnduha ma ghana hadik ta mbaku nda ma tsatsi, kel Lazglafta ka ghunagatá Zwanjani ta ghana hadik.

¹⁸ Mndu ta zlghafta Zwanja Lazglafta, had guma ta ghajani wa. Mndu kul zlghafta, nda ghada tsatá guma ta ghajani, kabga kwalani kul zlghafta Zwanja Lazglafta turtuktuk.

¹⁹ «Wya ghana tsa guma ya: Ma saha tsuwadak ta ghana hadik, ka zlanavatá mndu ta tsuwadak ka laghwí dvatá grusl, kabga slnaha tan kul dinaku.

²⁰ Inda mndu ta maga ghwadaka skwi, husanhusa tsuwadak. Had tsa mndu ya dza'a walanja sagha da tsuwadak wu da maravata slnani duway ta dabi.

²¹ Ka nermani nzakwa mndu kahwathwata katsi ná, dza'a saghasa da tsuwadak kada nghavata inda slnani ta magə tsi tsidid kazlay: Skwi ta magə tsi, zdfaganazda ta Lazglafta ka'a.»

Yuhwana mnda maga batem nda Yesu

22 Tahula tsa, ka sli'aftá Yesu kawadaga nda duhwalhani ka laghwi ta hadíka Zudiya. Ka nzdavató tsi tsəbakw fitik kawadaga nda həŋ hada. Ka magə tsi ta batem ŋa mnduha.

23 Ta magə Yuhwana ta batem guli ŋa mnduha ma sana vli ta hgə lu ka Inuŋ, ndusa nda sani vli ta hgə lu ka Salima, kabga dagala imi hada. Ka va sli'adaghatá mnduha ŋa maganaftá batem ta həŋ.

24 Ma tsa fitik ya, ta la a lu ksaghatá Yuhwana da gamak karaku wa.

25 Ka sli'anafá duhwalha Yuhwana ta zlərdutawi nda sana mnda la Yahuda ta ghəŋa gwada ta ghuḅa səla.

26 Ka sli'aftá həŋ ka lagha da mnay ŋa Yuhwana kazlay: Maləma dá! Tsa mndu si kawadaga nda kagha ta ɓla ghwa Zurdeŋ si ta mnə ka ta gwada ta ghəŋani ya kay ná, wa'a ta maga batem ŋa mnduha. Ta sli'i inda mnduha da tsi, ka həŋ.

27 Ka Yuhwana mantsa: «Had' mndu dza'a mut-saftá sana skwi ka Lazglafta a ta vlanṭa wa.

28 Nda sna kaghuni nda sləməŋa ghuni ta mnə yu tazlay “Kristi a i'i wu” kə'a. Ghunidik ghuna lu ma kdaku tsatsi ka sagha.

29 Ŋa zwaŋa midzi ta kla lu ta makwa, gra zwaŋa midzi ya guli ná, tavatani ta nzata tsi ka sna lwa gwada ta gwadagapta zwaŋa midzi. Snaŋtani ta gwada ta gwadagapta tsi ya, rfayni ta rfu. Manda tsaya ta rfa i'i ta rfu guli. Ndanana ná, rfu ŋa dá ta rfay.

30 Ka ŋla tsatsi nda ŋla, ka htakwa i'i nda hta.

31 «Mndu ya ta saha daga ta luwa ná, nzanaghanza tsatsi ta ghəŋa inda skwi demdem. Mndu ya ta ghəŋa hadik guli ná, ŋa ghəŋa hadik

tsatsi. Gwada ta ghəŋa skwi ta ghəŋa hadik ɲani ta gwadɔy. Mndu ta saha daga ta luwa ná, [ta ghəŋa inda skwi nzanaghata tsatsi].

³² Gwada ta ghəŋa skwi nghan tsi nda ya snaŋ tsi ta gwadə tsi. Had mndu ta tsu'aftá gwadani wa.

³³ Mndu ta tsu'aftá gwadani ná, grafgra tsa mndu ya ta Lazglafta kazlay: Kahwathwata ya kə'a.

³⁴ Mndu ghunaga Lazglafta ná, gwada Lazglafta ta gwadə tsi, kabga zwakuzwakwa Sulkum vlanj Lazglafta mida.

³⁵ «Dvudva Da ta Zwanj, ka fanamtá tsi ta inda skwi ma dzvani.

³⁶ Mndu ta zlghaftá tsa Zwanj ya mutsafmutsa ta hafu. Mndu ta kwalaghutá zlghaftá tsa zwanj ya mutsafta a ta tsa hafu ya wa. Ta ghəŋa basa ɲudufa Lazglafta yeya ta nzaku ta ghəŋani,» ka'a.

4

I Yesu nda markwa la Samari

¹ Ka snaŋtá la Farisa ta mnay kazlay: Mal mnduha ta sli'i da maga batem da Yesu ka ya da Yuhwana kə'a.

² Ka kahwathwatani ka lu mnay katsi ná, Yesu a ta maga batem ɲa mndu wu, duhwalhani zlanaj tsi ta magay. Snaŋta Yesu ta tsa gwada ta mnə lu ya,

³ ka sli'aftá tsi ta hadika Zudiya ɲa vrə ta hadika Galili.

⁴ Wya nda ma hadika Samari ta laba tsi ya,

⁵ ka ɓhadaghatá tsi da sana vli ta hgə lu ka Sikar ndusa nda vwaha Yakubu ta vlanjta zwanjani Yusufu bamma, ta hadika Samari.

⁶ Ma tsa vli ya, mamu vøvrøma Yakubu. Manda hørfatá Yesu ta mbada, ka nzatá tsi ta wa tsa vøvrøm ya, wør ma ghøj fitik nda tsa.

⁷ Ka lagha sana markwa la Samari da ta imi. «Tidifta ta imi ka sa'ata yu,» ka Yesu nda tsi.

⁸ Ma tsa fitik ya, laghula duhwalhani da luwa da skwa skwa zay.

⁹ «Waka kagha ta nzakway ka mnda la Yahuda, ta dawá imi ña say da i'i ta nzakway ka markwa la Samari na?» ka tsa marakw ya nda tsi. Tsaw had la Yahuda ta guya vgha nda la Samari wa.

¹⁰ Ka Yesu mantsa: «Ka má nda sna ka ta skwi ta kumø Lazglafta ta vlaghata, nda mndu ya ta dawá imi ña say da kagha katsi ná, má kagha má dza'a dawá imi ña say, má ña vlaghatani ta imi ta vla hafu,» ka'a nda tsi.

¹¹ Ka tsa marakw ya nda tsi mantsa: «Mghama dá! wana had skwi ña tagafta da kagha wu, nda la na vøvrøm na guli, ga dza'a mutsa ka ta tsa imi ta vla hafu ya na?»

¹² Mal kagha ka dzidza ñni Yakubu si ta sa ima na vøvrøm na nda zwanani, nda rinani tani, ka zlanñantá tsi na ra?» ka'a.

¹³ Ka Yesu nda tsi Mantsa: «Dør wati ma mndu ta sa na imi na ná, ta dza'a kuzlanñkuzla ndala,

¹⁴ ama mndu dza'a sa na imi dza'a vlanñta yu na ná, walglanñta a ndala ta kuzlanñta wa. Tsa imi dza'a vlanñta yu ya ná, dza'a nuna ka dzuóay, ña mbøzagapta hafu ña kðekedzen midá,» ka Yesu nda tsi.

¹⁵ «Mghama dá! Vlihavla ta tsa imi ya tsa, kada kwala ndala ta kuzliglihata, ka kwala yu ta søglagha da ta imi hadna,» ka tsa marakw ya nda

tsi.

¹⁶ «La hgaktá zə'ala ghuni, ka sagha kuni da hadna,» ka Yesu nda tsa marakw ya.

¹⁷ «Had zə'ala dá wu,» ka tsa marakw ya nda tsi. Ka Yesu nda tsi mantsa: «Ta ŋa gha ta mnay kazlay: Hadu zə'ala dá wu kə'a,

¹⁸ kabga hutaf zə'ala gha. Nana ga taŋ ka ndanana guli, zə'ala ghuni a wu, raghatani mnay gha mantsa ya,» ka Yesu nda tsi.

¹⁹ «Mghama dá! Anabi ka ta grə yu nda na skwi na.

²⁰ Dzidzíha ŋni la Samari ná, ta na ghwá na si ta maga həŋ ta du'a ŋa Lazglafta. Ka kaghuni la Yahuda ná, ma Ursalima vla maga du'a ŋa Lazglafta, ka kaghuni,» ka tsa marakw ya.

²¹ Ka Yesu nda tsi mantsa: «Marakw na, zlg hafzlg ha ta i'i. Dza'a saghasa fitik dza'a kwal kuni maga du'a ŋa Da ta na ghwá na, dər ma Ursalima.

²² Kaghuni la Samari, ŋa skwi kul snanťa kuni ta maga kuni ta du'a. Anŋni la Yahuda, ŋa skwi snan ŋni ta maga ŋni ta du'a, kabga da la Yahuda sagha mbaku.

²³ Dza'a saghasa fitik, nda maga vani ndanana. Ma Sulkum nda ya ma kahwathwata dza'a kəl mnduha ka maga du'a, ŋa tsəbay taŋ ta tsəlbu ŋa Da, kabga mndərga tsa mnduha ta tsəba tsa tsəlbu ya ta zbə Da.

²⁴ Lazglafta ná, Sulkum ya. Tsa mnduha ta maga du'a ŋani ya, ma Sulkum nda ya ma kahwathwata ta maga həŋ,» ka Yesu nda tsi.

²⁵ «Nda sna yu kazlay: Dza'a saghasa Almasihu, ta hgə lu ka Kristi ya, kə'a. Ka saghasa tsi, dza'a mnanŋamna ta inda skwi,» ka tsa marakw ya nda

tsi.

²⁶ «Tsa mndu ta mnə kagha ya na i'i ta gwada nda kagha na,» ka Yesu nda tsi.

²⁷ Tata gwada həŋ, ka vraktá duhwalhani. Ka ndərmimi duhwalhani ta tsa nzatani ka gwada nda tsa marakw ya. Tsitsirid, nzanza həŋ, hadya ta pslanaftawi, ka dawanta da tsi kazlay: Nu ta daw ka da tsi, ari nu ta gwadə ka nda tsi na kə'a wa.

²⁸ Ka gi zlanatá tsa marakw ya ta bzleghwani hada ka laghwi da luwa da mnay ŋa mnduha.

²⁹ Ka'a mantsa: «Sawa ngha mndu ta mnihatá inda skwiha maga yu 6a, zlah Kristi na mndu na?» ka'a.

³⁰ Ka sli'agaptá mnduha ma luwa, ka lagha slanaghatá Yesu.

³¹ «Maləma da! Kwa za ta skwa zay misim-misim,» ka duhwalhani nda Yesu, ma tsa fitik ya.

³² «Mamu skwa zaya da kul snantá kaghuni,» ka Yesu nda həŋ.

³³ «Mamu mndu ta klanaktá skwa zay ra?» ka duhwalhani mataba taŋ.

³⁴ Ka Yesu nda həŋ mantsa: «Maga skwi ta zdəganatá mndu ya ta ghunighata ka kdīnistá slhani, skwa zaya da.

³⁵ «Ta fwad pđakwa tili ka tska nimaya ta vwah» a ka kaghuni ndanana wu ra? ka i'i nda kaghuni wa, nghadapwangha ta ndəhatá nimaya ta vwah 6a, ta ghwan a lu ka ts kay wa.

³⁶ Mndu ta tska nimaya ta vwah ná, ta mutsay ta nisəlani, ŋa tskanatani ta hulfani ŋa hafu ŋa kdekedzen. Mantsa ya, ŋa rfay mndu ta sləgafu nda mndu ta ts kata ta rfu kawadaga.

³⁷ Tsa mahdihdi mnə lu kazlay: Slgadatá slgaysl-gay ɲa sani, tskatá tskaytskay ɲa sani kə'a ya ná, kahwathwata nzakwani.

³⁸ Da vli kul magatá kuni ta slna ghunaghunafta yu. Ghuyghuya sanlaha ta danwa ma slna, ka lagha kaghuni da ɲatsa ndela tsa slna tan ya,» ka'a.

³⁹ Nda ndəgha la Samari ma tsa luwa tan ya ta zlghaftá Yesu ta ghəɲa tsa gwada mna tsa marakw ya ta mnay kazlay: Ka mnihatá tsi ta inda skwiha maga yu kə'a ya.

⁴⁰ Ma lagha la Samari da slanaghatá Yesu, ka ndəbə hən ta dzvu da tsi ɲa nzatani kawadaga nda hən. Ka nzatá tsi ka zatá fitik his hada da hən.

⁴¹ Ka sgavaghatá ndəghata mnduha ta zlghaftá Yesu, kabga Yesu ka ghəɲani ta mna gwadani ɲa tan.

⁴² «Zlghafzlgħa aɲni ndanana tama makwa na, kabga gwada għa mna ka yeya a wa. Nda sna vərda aɲni nda sləməɲa ɲni. Grafgra ɲni kahwathwata kazlay: Na mndu na ná, mnda mba mnduha ta ghəɲa hadik ya kə'a.»

Mbanafta Yesu ta zwanja sana mnda ksa slna ɲumna

⁴³ Tahula tsa fitik his ya, ka sli'aftá Yesu hada ka laghwi ta hadika Galili.

⁴⁴ Tsaw si wya ka Yesu mnata: «Had lu ta vla glaku ɲa anabi ta hadikani wu» kə'a.

⁴⁵ Bhadaghatani ta hadika Galili, ka tsu'aftá gwal hada. Tsa gwal ta tsu'afta ya ná, gwal ta nghanjá inda skwi maga Yesu ma Ursalima ma fitika skala Pak ya, kabga si labla hahən guli da vla tsa skalu ya.

⁴⁶ Ka vraghatá tsi tama da luwa Kana ta hadika Galili, ma vla mbəđanaftani ta imi ka ima inabi ya kay. Tsaw mamu sana mndu dagala ma slna ŋumna, ta maga slna ga mgham ma luwa Kafar-nahum, kul dughwanaku zwanjani ta kala ghəŋ.

⁴⁷ Snaŋtani kazlay: Sli'afslí'a Yesu ta hadika Zudiya, ka sagha ta hadika Galili kə'a, ka sli'aftá tsi ka lagha slanaghata. Ka'a nda tsi mantša: «Kdəkkdək, mbada mbanaftá zwanja da kul dughwanaku, ta kala ghəŋ,» ka'a.

⁴⁸ Ka Yesu nda tsi mantša: «Ka ta ngha a kaghuni ta mazəməm nda skwa ndərmimay wu ná, zlgħa a kaghuni kay tama wa!» ka'a.

⁴⁹ Ka tsa mndu ta maga slna ga mgham ya nda tsi mantša: «Mghama da! Mbadā ma kdaku zwanja da mtuta,» ka nda tsi.

⁵⁰ Ka Yesu nda tsi mantša: «La dzagħa! Wa a zwanja għa wdərwdər,» ka'a.

Ka zlgħaftá tsa mndu ya ta tsa gwada mnana Yesu ya, ka sli'aftá tsi ka lagħwi dzagħani.

⁵¹ Ta laha tsi ta tvi ta dza'a dzagħa, ka guyatá tsi nda kwalvahani ta ŋlu da mnay ŋani kazlay: Wa'a nda mba zwanja għa wdər kə'a.

⁵² Ka tsa mndu ya mantša: «Ta wati luwa lejavata tsi na?» ka'a dawəŋta da həŋ. «Kí'a hdzikata fitik ma ghəŋ dahawu, ta lavagħutá tsa ŋudidarani ya,» ka həŋ nda tsi.

⁵³ Ka graftá tsa dani ya, ta tsa luwa ya mna Yesu ŋani kazlay: Wdərwdər zwanja għa kə'a ya. Daga badu tsa ka zlgħaftá tsatsi nda gwal ga taŋ tani ta Yesu.

⁵⁴ Tsaya mahisa mazəməm maga Yesu ta hadika Galili manda zlanjani ta hadika Zudiya.

5

Mbanafu Yesu ta sana mndu nda raghwa səlani

¹ Tahula tsaya, ka slatá skala la Yahuda ma Ursalima. Ka laf Yesu da hada.

² Tsaw ma Ursalima, mamu sana ghwa tsap lu ndusa nda watgha saba tuwakha. Betsayda ta hga lu ta tsa ghwa ya nda gwada Hebru. Ta wa tsa ghwa ya mamu glakamha hutaf.

³ Ma tsa glakamha ya, mamu ndəghata gwal kul dughwanaku mida, manda gwal nda ghulpa, nda gwal ta dzəgidi, nda gwal nda rwa səla tanj nda dzva tanj ta kzla gigdavata imi.

⁴ Tsaw ta sasa duhwala Lazglafta tazlay da tsa imi ya ŋa gigdanafta. Ka gigdavafgigda tsa imi ya, ka tinjəl wa ta gi laha dida tahula gigdavafgigda tsa imi ya, nda mba tsa mndu ya dər kinawu tsa danjwani ya.

⁵ Hkənmbsak tghas mida vakwa sana mndu ma danjwani ta nzaku hada.

⁶ Kə'a ka Yesu ná, ta hani tsa mndu ya. Nda sna guli kazlay: Nda kda fitikani ta bəsa tsa danjwa ya kə'a. «Ta kumay ka ta mbafta gha ra?» ka'a nda tsi.

⁷ «Mghama da! Had mnda da ŋa fadihata da imi gigdavafər tsi wa. Ka dza'a yu, ka yu ya ná, gi tinjlaghuta sani ta laha ka i'i,» ka tsa mndu kul dughwanaku ya nda tsi.

⁸ «Sli'afsl'i'a gha kla ta skwa hana gha, ka sli'a ka,» ka Yesu nda tsi.

⁹ Gi hadahada ka mbaftá tsa mndu ya, sləŋad klaftá skwa hanani, ka sli'i. Tsaw, bađu Sabat magakwa tsa skwi ya.

¹⁰ Ka la mali ma la Yahuda nda tsa mndu mbanaf lu ya mantša: «Sabat a vli gita kay ra? Wa ta mnaghatá kla skwa hana gha na?» ka həŋ.

11 «“Kla ta skwa hana gha, ka sli'a ka” ka tsa mndu ta mbadifta ya nda i'i,» ka'a nda hən.

12 «Wa tsa mndu ta mnaghata kazlay: Kla ta skwa hana gha ka sli'a ka kə'a ya na?» ka hən dawanta da tsi.

13 Tsaw sna a tsa mndu mbanaf lu ya ta tsa mndu ta mbanaf ta wu, kabga zadamzada Yesu mataba tskata mnduha ma tsa vli ya.

14 Bats nzda, ka guyafta Yesu ta vgha nda tsa mndu ya ma daɓa həga Lazglafta. «Wana nda mba ka ndana tama, yaha ka walglanta maga dmaku da slaghaghatá ya katakata ta malaghutá tsaya,» ka Yesu nda tsi.

15 Ka sli'afta tsa mndu ya, ka laghwi da mnay na la mali ma la Yahuda kazlay: Yesu tsa mndu ta mbidifta ya kay kə'a.

16 Tsaya kəl la mali ma la Yahuda ka zba htsiɲa Yesu, kabga magatani ta tsa skwi ya baɗu Sabat.

17 Ka Yesu nda hən mantsa: «Tata maga slna Da da kulam ndanana, mantsa i'i guli, tata maga slna yu kulam ndanana,» ka'a.

18 Ta ghəna tsa gwada gwada tsi ya, ka zbəgəlta la mali mataba la Yahuda ta Yesu na dzata. Ta ghəna vəl ɓlanaptani ta zlaɲa Sabat kwenkwen a ta zba hən wu, kabga mnayni kazlay: Vərda Lazglafta na Da da kə'a ta gra ghəjani nda Lazglafta guli ya.

Vlanɲa dani ta inda mbrakwani ta zwanjani

19 Ka Yesu vrəglinta gwadani nda hən mantsa: «Kahwathwata ka yu ta mnaghunata, laviɲ a zwanj ta magatá skwi gaghən gaghəjani, ka ngha a tsi ta skwi ta magə Da wa. Ka kinawu ta maga Da ta inda skwi ya, ka gragra mantsa ya ta maga zwanj guli.

²⁰ Ta dʒvay Da ta zwanj. Tsaya ta kəl tsi ka marananjta inda skwi ta magə tsi, ɲa marananjani ta slnaha ta malaghutá nana, kada nghanjta kuni ta skwa ndərmimay.

²¹ Manda ya ta sli'aganapta Da ta gwal nda rwa nda hafu ya, mantša ya ta vlanjta zwanj ta hafu ɲa mndu ta kumə tsi.

²² Tsa a Da ta guma ta ghəɲa mndu wu, ma dzva zwanj fanamta tsi ta inda guma ɲa gumay,

²³ kada vla inda mndu ta glaku ɲa zwanj, manda ya ta vlə həɲ ta glaku ɲa Da ya. Ka vla a mndu ta glaku ɲa zwanj wu katsi, hadʒ tsa mndu ya ta vla glaku ɲa Da ta ghunagatá tsa zwanj ya wa.

²⁴ «Kahwathwata ka yu ta mnaghunata, mndu ta sna gwada da, ka zlghaftá tsi ta mndu ta ghunigihatá, mamu hafu ɲa kdekedzerj ma tsa mndu ya. Hadʒ lu dza'a tsanaghatá guma ta tsa mndu ya wa. Nda ghada Pak tsa mndu ya ta mtaku ka laghwi da hafu.

²⁵ Kahwathwata ka yu ta mnaghunata, dza'a saghasa fitik, nda ghada va saghani, dza'a kəl gwal nda rwa ka snanjta lwa Zwanja Lazglafita. Tsa gwal dza'a snanjta ya dza'a nzakway nda hafu.

²⁶ Manda daslakwa hafu ta nzaku ma Da ya, manda tsaya vlanjta tsi ta zwanj ɲa mutsakwa hafu ma tsatsi guli.

²⁷ Ka vlanjta tsi ta mbrakwa tsa guma, kabga nzakwani ka Zwanja mndu.

²⁸ Tsaya a skwi ɲa ndərmimay ghuni wu, dza'a saghasa fitik dza'a kəl inda gwal ma kulu ka snanjta lwani

²⁹ ɲa sli'agapta tanj. Gwal ta maga skwi dina ya, dza'a sli'agapta ɲa nzata nda hafu hahəɲ. Gwal ta

maga skwi kul dinaku ya guli, dza'a sli'agapta ɲa tsanaghatá guma ta hən hahən.»

Nzakwa Zwan ka maslɛmtsək

³⁰ Ka Yesu mantsa: «Had sana skwi dza'a mag-ata i'i gaghən gaghəɲa da wa. Manda ya mniha Lazglafta ta tsa yu ta guma. Nda tvani ta tsa yu ta guma kabga zba a yu ta skwi ta kumə ghəɲa da wu, skwi ta zdəganatá mndu ta ghunigihata ta zbə yu.

³¹ «Ka i'i katsi mnatá gwada ta ghəɲa da katsi ná, had hayhaya tsa gwada da ya nda tsa wa.

³² Ka sana mndu katsi mna gwada ta ghəɲa i'i katsi, nda sna yu kazlay: Tsa gwada ta mnə tsi ta ghəɲa i'i ya ná, kahwathwata nzakwani kə'a.

³³ Ghunaf ghuna kuni ta mnduha da Yuhwana ka mnaghunatá tsi ta kahwathwata.

³⁴ I'i tada ná, zban a yu ta mndu ɲa mna gwada ta ghəɲa da wa. Tsaya kwenkwen mnaghuna yu ɲa mutsay ghuni ta hafu.

³⁵ Yuhwana ná, pitirla ta zlghaku ka tsuwadaka vli ya. Kumanɲkuma kuni ta nzdavata nda rfu ma tsuwadakani.

³⁶ «I'i, mamu ɲa da ma gwada ta ghəɲa da ta malaghutá ɲa Yuhwana. Tsa gwada ya ná, slnaha vliha Da ɲa kdanafta da ta magay ya. Tsa slnaha ta kdə yu ta magay ya, ta maranɲa tsidid kazlay: Da ya ta ghunigihata kə'a.

³⁷ Tsa Da ta ghunigihata ya, ta mnanɲá gwada ta ghəɲa da. An mndani ta walaɲ a kuni ta snanɲá lwani wa. Ta walaɲ a kuni ta nghanɲá kumani guli wa.

³⁸ Nza a gwadani ma ɲudufa ghuni wu kabga zlghaf a kuni ta mndu ya ghunaga tsi wa.

³⁹ «Ta ndi'andi'a kuni ka tagha skwi ya nda vinda ma gwada Lazglafta kabga mida dza'a mutsa ηni ta hafu ηa kdekedzenj ka kuni. Tsa gwada Lazglafta nda vinda ya ná, ta ghəηa i'i ta gwada tsi.

⁴⁰ Sew va a kuni ta sagha da i'i ηa mutsa vərda hafu wa.

⁴¹ «Da mnda səla a ta mutsa i'i ta glakwa da wa.

⁴² Tsaw nda sna i'i ta kaghuni tsidid kazlay: Dvu a kuni ta Lazglafta wu kə'a.

⁴³ Da da ta ghunigihata, ka kwalaghutá kuni ta tsu'aftá i'i. Ka ma sana mndu ta klaftá ghəηani ka ghəηani ka sagha katsi ná, má tsu'aftsu'a kuni.

⁴⁴ Kaghuni gwal ta dva glaku da sani nda sani, ka kwalaghutá zba glaku daga da Lazglafta turtukwani, waka kuni má dza'a zlghafta na?

⁴⁵ «Yaha kuni da uwalay kazlay: Dza'a wlay yu ta kaghuni da Lazglafta kə'a. Tsa Musa faf kaghuni ta ghəη tida ya dza'a wla kaghuni.

⁴⁶ Ka má zlhafzlgħa kuni ta Musa katsi ná, má zlhafzlgħa kuni ta i'i guli, kabga vindaf ta ghəηa i'i tsatsi ta gwada.

⁴⁷ Ka si zlgħaf a kaghuni ta skwi vindaf tsatsi ya wu ní, waka kuni dza'a zlghaftá gwada da na?» ka'a.

6

*Zurta Yesu ta skwa zay ta mnduha dambu' hutaf
Mat 14:13-21, Mak 6:30-44, Luk 9:10-17*

¹ Tahula tsaya, ka sli'aftá Yesu ka laghwi ta sana bla tsa ghwa Galili ta hgə lu ka Tiberyad ya guli.

² Ka sli'aftá dəmgā rutut mistani nghər həη ta mazəməm, ka mbamba gwal kul dughwanaku.

³ Ka ɲlaghatá Yesu ta ghwá ka nzagata hada kawadaga nda duhwalhani.

⁴ Tsaw ndusa fitika skala Pak ta nzakway ka skala la Yahuda.

⁵ Kə'a ka Yesu klanťá ghəŋ ka nghadapta ná, rutututa dəmga ta lagha da tsi. Ka'a mantsa: «Ga dza'a skwakta mu ta buradi ɲa zunustá na ndəghata mnduha na?» ka Yesu nda Filip.

⁶ ɲa tsakwasla gwada da tsi kəl tsi ka mnanata mantsa, kabga nda sna tsatsi ta skwi dza'a tsi magay.

⁷ Ka Filip nda tsi mantsa: «Dər tседа vagma mnduha his dər mək* ta maga slna klaf lu ɲa dzawaktá buradi nda tsi ná, slaghu a dər ɲa valanťá həŋ ki'a ki'a wu,» ka'a nda tsi.

⁸ Ka sani mataba duhwalhani ta nzakway ka Andre zwanjamani ma Simuŋ Piyer nda tsi mantsa:

⁹ «Mamu sana zwanj hadna nda buradi hutaf nda tsulhwa zwana klipi his da tsi, tsaw ɲa slafta kawu mataba ndəghata mnduha mandana na?» ka'a.

¹⁰ Ka Yesu mantsa: «Mnanawa mna ta həŋ ka nzanzata həŋ nda nzanza,» ka'a. Tsaw mamu dýatá kuzuŋ ksif ma tsa vli ya, ka nzanzafťá mnduha ta maga dəmbu' hutaf tida.

¹¹ Ka hlaftá Yesu ta tsa buradiha ya, ka rfanaghatá tsi ta Lazglafta ta ghəŋani, ka daganafťá tsi ta tsa mnduha ta nzaku ya. Ka daganafťá tsi ta tsa klipiha ya ta həŋ guli manda ya ta kumə həŋ.

¹² Manda babaghawta mnduha, «Tskafwa padakwani yaha da badzuta,» ka Yesu nda duhwalhani.

* 6:7 Ngha ta Mata 20:2.

13 Ka tsakaftá hən, ka ndaghanaftá hən ta ghwanak ghwanpɔdə his nda pɔakwa tsa buradi hutaf ya, tahula babaghawta tan demdem.

14 «Nana mndu na vərɔa anabi dza'a sagha ta ghəŋa hadik mnə lu kay ya,» ka tsa mnduha ta nghanjta mazəmzəm maga Yesu ya.

15 Tsatsafta Yesu kazlay: Dza'a saghasa lu da ksafita nda mbraku ŋa nzakwani ka mgham kə'a, ka kdɪŋta Yesu ta ŋləglaghata ta ghwá.

Mbaɔay Yesu ta mbaɔa ta imi

Mat 14:22-33, Mak 6:45-52

16 Magatá hawu, ka sli'agatá duhwalhani ta wa drəf.

17 Ka sli'adamtá hən da kwambalu ŋa tsughwada drəf ŋa dza'a da luwa Kafarnahum. Nda ghada kuzatá vli, ta vradagha a Yesu slanaghatá hən wa.

18 Tata ndrə hən, ka sli'avafatá falak dagala katakata, ka kapatsa'uwaku drəf.

19 Swadap swa duhwalha Yesu ta kwambalu ta maga meli hutaf ka mku' a tsi, ka nghanjta hən ta Yesu ta mbaɔa ta drəf ta ndusadaghata tavata kwambalu, ka ksafitá zlən ta hən.

20 «I'i ya tane! Ma zlən kuni ta zlən!» ka Yesu nda hən.

21 Si ta kumay hən ta klamta da kwambalu si-zlay, gi nda ɔhadaghata kwambalu da tsa vli ta dza'a hən ya.

Zbay dəmgə ta Yesu

22 Gamahtsimani, ka havaktá tsa mnduha ta nzaku ta wa drəf ya kazlay: Turtuktuk kwambalu si ta lagha da tsa vli ya kə'a. Grafgra hən guli

kazlay: Lamə a Yesu kawadaga nda duhwalhani dida wu kə'a. Nda ghəŋa taŋ laghwa duhwalhani.

²³ Ma va tsa fitik ya, ka sli'aftá sana kwambaluha ma luwa Tiberiya, ka ǵhadaghatá həŋ ndusa nda tsa vli kəl Mgham Yesu ka rfanaghatá Lazglafta ta ghəŋa buradi, ka zutá mnduha ya kay.

²⁴ Nghay mnduha ná, had Yesu hada wu, had duhwalhani hada guli wu, ka sli'adamtá həŋ da tsa kwambalu ya ka laghwi da luwa Kafarnahum da zba Yesu.

Yesu ná, dafa hafu ya

²⁵ Ka ǵhadaghatá həŋ ka zbə həŋ, ka slanaghatá həŋ ta wa sana ǵla tsa drəf ya. «Maləma da! Yawu saghwa ka da hadna kay?» ka həŋ nda tsi.

²⁶ Ka Yesu nda həŋ mantsa: «Kahwathwata ka yu ta mnaghunata, ta zbə kabga vəl nghan̄ta ghuni ta mazəməzəm a kuni ta i'i wa. Ta zbə kabga zuta ghuni ta buradi, ka baghaftá kuni, kuni ta i'i.

²⁷ Ma ksə kuni ta slna ŋa skwa zay dza'a ǵadzuta. Njavawaŋa ka maga slna ŋa skwa zay ta nzdavata dza'a vlaghunatá hafu ŋa kǵekedzeŋ. Tsa skwa zay ya ná, Zwaŋa mndu dza'a vlaghunata, kabga ta tsatsi thafta Da ta ŋizla vlaŋtani ta mbraku,» ka'a nda həŋ.

²⁸ Ka həŋ nda tsi mantsa: «Nahgani dza'a aŋni magay ŋa kǵiŋtá magatá slna Lazglafta na?» ka həŋ.

²⁹ Ka Yesu nda həŋ mantsa: «Zlghafta ghuni ta mndu ya ghunaga tsi, na slna ya ta kzlə Lazglafta ta maganata ghuni,» ka'a.

³⁰ Ka həŋ mantsa: «Mndərga wati mazəmzəm laviŋ ka ta maganata ŋa nghanata ŋni, kada zlgħafta ŋni ta kagha na? Wati sina dza'a ka magata na?

³¹ Zuza dzidziha ŋni ta Mana ma mtak. Manda ya nda vinda na: “vlagavla ta buradi daga ta luwa† ŋa taŋ, ŋa zay taŋ,» ka həŋ nda tsi.

³² Ka Yesu nda həŋ mantsa: «Kahwathwata ka yu ta mnaghunata, Musa a ta vlaghunatá buradi ta saha ta luwa wa, Da da ta vlatá buradi ta saha ta luwa.

³³ Tsa Buradi vloga Lazglafta ya ná, tsa ta saha ta luwa ta vla hafu ŋa mnduha ta ghəŋa hadik yeya,» ka'a nda həŋ.

³⁴ Ka həŋ mantsa: «Mghama da! gdagda ta vlanatá mndərga tsa buradi ya,» ka həŋ.

³⁵ Ka Yesu nda həŋ mantsa: «I'i buradi ta vla hafu. Ka saghasa mndu da i'i, walganata a maya ta kuzlanata wa. Ka zlgħafzlgħa mndu ta i'i, walganata a ndala ta kuzlanata wa.

³⁶ Wya mnaghunamna yu, nda nghan kuni ta i'i, ka kwalaghutá kuni ta zlgħaftá i'i.

³⁷ Inda gwal vliha Da, dza'a saghasa həŋ da i'i. Had'i'i guli dza'a zlanatá mndu ya ta sagha da i'i ma bli wa.

³⁸ Sa a i'i ta luwa ŋa maga skwi ta kumə yu wa. Sasa i'i ŋa maga skwi ta kumə mndu ta ghunighata.

³⁹ Skwi ta kumə mndu ta ghunighata ná, kwala da kul zlanaghutá inda gwal vliha tsi, ŋa sli'aganapta da ta həŋ bađu kdakwa ghəŋa hadik.

† 6:31 Nghan ta Sabi 16:13-15, 31.

⁴⁰ Wya skwi ta kumə Da da, dər wati ma mndu ta nghanjá zwanj ka zlgħaftá tsi, nda mutsa hafani ŋa kdekedzenj. Dza'a sli'aganapsli'a yu bađu kďakwa ghəŋa hadik,» ka'a.

⁴¹ Ka rurunwaku la Yahuda ta ghəŋani, kabga mnayni kazlay: I'i buradi ta saha daga ta luwa kə'a.

⁴² «Tsatsi a Yesu zwanja Yusufu kay wu ra? Tsatsi a na snanj amu ta i dani nda mani na ra? Ta ghəŋa wu ta mna tsi kazlay: Sa daga ta luwa yu kə'a ba?» ka həŋ.

⁴³ Ka Yesu nda həŋ mantša: «Zlanawazla ta rurunwaku mataba ghuni,

⁴⁴ had' mndu dza'a laviŋtá sagha da i'i, ka ghunagaha a Da ta ghunigihata da i'i wa. I'i, dza'a sli'aganapsli'a yu ta tsa mndu ya bađu kďakwa ghəŋa hadik.

⁴⁵ Wya skwi vindaf la anabi: “Dza'a taghanaf-tagha Lazglafta‡ ta skwiha ta həŋ.” Dər wa ta snay, ka zlgħaftá tsa skwi ta taghə Lazglafta ya, dza'a saghasa tsa mndu ya da i'i.

⁴⁶ Va a tsaya ta mnay kazlay: Nda ngha tsa mndu ya ta Da nda irani kə'a wu, ba mndu ta saha da Lazglafta yeya nda ngha ta Da nda irani.

⁴⁷ Kahwathwata ka yu ta mnaghunata, mndu ta zlgħaftá i'i, nda mutsa hafani ŋa kdekedzenj.

⁴⁸ I'i buradi ta vla hafu.

⁴⁹ Zuza dzidziha ghuni ta mana ma mtak, kulam nda tsa, rwurwa inda tanj.

⁵⁰ Wana buradi ta saha daga ta luwa hadna. Mndu ta zay, mtəta a wa.

‡ 6:45 Ngha ta Isaya 54:13.

⁵¹ Ii buradi ta vla hafu ta saha daga ta luwa. Kata zay mndu ta tsa buradi ya, dza'a nzaku tsa mndu ya nda hafu na kdekeden. Tsa buradi ta vla yu ya ná, slu'uvgha da ya. Dza'a vlay yu, kada nzakwa mnduha ta ghona hadik nda hafu,» ka Yesu nda hən.

⁵² Ka hən mantsa: «Waka na mndu na dza'a vlamata slu'uvghani na zay na?» ka la Yahuda zlganafta ta ghonani.

⁵³ Ka Yesu nda hən mantsa: «Kahwathwata ka yu ta mnaghunata, ka za a kuni ta slu'uvgha Zwanja mndu, sa a kuni ta usani wu katsi, had hafu dekdek ma kaghuni wa.

⁵⁴ Mndu ta za slu'uvgha da, ta sa usa da, mamu hafu na kdekeden ma tsa mndu ya. Dza'a sli'aganapsli'a yu ta tsa mndu ya badu kdakwa ghona hadik.

⁵⁵ Verda skwa zay ná, slu'uvgha da ya. Verda skwa say guli ná, usa da ya.

⁵⁶ Mndu ta za slu'uvgha da, ta sa usa da ná, ma i'i ta nzamta tsa mndu ya, ma tsa mndu ya nzamta i'i guli.

⁵⁷ Tsa Da ta ghunigihata ya ná, nda hafu mida. Nda tsatsi ta nzakwa i'i nda hafu. Mantsa ya guli ka ta zay mndu ta i'i, dza'a nzanza nda hafu.

⁵⁸ Wana buradi ta saha daga ta luwa hadna. Nza a manda na dzidzihha ghuni ta zuta mana ka rwuta hən ya wa. Mndu ta za na buradi na ná, dza'a nzanza nda hafu na kdekeden,» ka Yesu nda hən.

⁵⁹ Ta taghe tsi ta skwi ma hoga tagha skwa la Yahuda ma Kafarnahum, mna Yesu ta tsa gwada ya.

Zlanavata sanlaha ma duhwalhani ta Yesu

⁶⁰ Ka sanlaha mataba duhwalhani snaŋər həŋ ta tsa gwada ya mantsa: «Dukdukwa na gwada na, wa dza'a laviŋta snay na?» ka həŋ.

⁶¹ Daslafta Yesu ma vghani kazlay: Ta ruruŋwaku duhwalhani ta ghəŋa tsa tagha skwi ya kə'a, «nda ŋra ŋudufa kaghuni guli ra?

⁶² A ka tsa nghanj kuni ta Zwanja mndu ta ŋlu da vli si hada tsi ghalya, waka ŋudufa ghuni dza'a magay tama?

⁶³ Sulkuma Lazglafta ta vla hafu, had sana skwi laviŋ mnda səla ta magata wa. Na gwada mnaghuna yu na ná, Sulkum nda hafu ya.

⁶⁴ Tsaw mataba ghuni ná, mamu sanlaha kul zlghafta dekdek,» ka Yesu nda həŋ. Tsaw nda sna Yesu daga zraftani ta gwal kul zlghafta dekdek, nda mndu ya dza'a skwapta tani.

⁶⁵ Ka Yesu sganaghata mantsa: «Tsaya kəl yu ka mnay ŋa ghuni kazlay: Had mndu dza'a laviŋta sagha da i'i, ka ghunak a Da wu kə'a ya,» ka'a.

⁶⁶ Tahula mnata Yesu ta tsa gwada ya, nda ndəgha sanlaha ma duhwalhani ta vraghuta, ka kwal kul dza'agelta mistani.

⁶⁷ Ka Yesu mantsa: «Ki kaghuni, sli'a a kaghuni guli ra?» ka'a nda tsa gwal ghwanpədə his ya.

⁶⁸ Ka Simuŋ Piyer mantsa: «Mghama da! Da wa ta dza'a ŋni? Ya wana mamu gwada hafu ŋa kdekedzen da kagha.

⁶⁹ Zlghafzlgħa ŋni, nda sna ŋni guli kazlay: Kristi mndu nda ghuḍa ta saha daga da Lazglafta kagha kə'a,» ka'a nda tsi.

⁷⁰ Ka Yesu mantsa: «I'i a ta daŋaptá na kaghuni ghwanpədə his na ra? Nziya nza tsi ná, ka halaway

ya turtuk mataba ghuni,» ka'a nda hən.

⁷¹ Ta ghəŋa Zudas Iskaryut zwaŋa Simuŋ ta mna tsi ta tsaya kabga tsatsi mndu dza'a skwapta, dər má tekw tsatsi mataba tsa gwal ghwanpɔdə his ya.

7

Kwalaghuta zwanamani ta zlgħaftá Yesu

¹ Tahula tsa, mbaɔa Yesu ka ra haɔika Galili. Va a ta dza'a ta haɔika Zudiya wu, kabga ta ɔakwatsay ɔakwatsay maliha ta ghəŋa la Yahuda hada ŋa dzata.

² Tsaw ndusakndusa fitika skala dumbi da la Yahuda.

³ «Sli'afsli'a gha ka dza'a ka ta haɔika Zudiya kada nghanɔa duhwalha gha guli ta slna ta magə ka,

⁴ haɔ mndu ta kuma maraŋtá ghəŋani ta ɔifa ghəŋani wa. Ya wya mamu skwiha ta magə ka ya, maraŋmara ta ghəŋa gha banluwa ŋa nghanɔa inda mnduha ta kagha,» ka zwanamani nda tsi.

⁵ Tsaw ta zlgħaf a zwanamani ta tsatsi wa.

⁶ Ka Yesu nda hən mantsa: «Ta sagha a fitika ɔa wa. Ŋa kaghuni ya ná, dər ta wati luwa tsi, nda maga fitik, ka kaghuni.

⁷ Haɔ kaghuni ta husaŋtá mnduha wa. I'i ná, husaŋhusa yu ta mnduha, kabga ta mnanaŋmna yu ta slna taŋ kul ɔinaku ta hən.

⁸ Lawala kaghuni! La a i'i wu, kabga ta kɔa a sagha fitika ɔa karaku wu,» ka Yesu nda hən.

⁹ Tahula mnanatani ta tsa gwaɔa ya ta hən, ka nzaghutá tsatsi ma Galili.

10 Manda laghwa zwanamani da vla skalu, ka sli'aftá tsatsi ka ghəṇani ka lafi ma dīfa ma dīfa, kul maraṇtá ghəṇani banluwa.

Taghay Yesu ta skwi ma həga Lazglafta

11 Ka la Yahuda mantsa: «Ga tsatsi tama!» ka həṇ ka zba Yesu ma vla skalu.

12 Ka sli'avaftá zlərdutawi ka ṇḁaṇḁa ta ghəṇa tsatsi mataba mnduha kazlay: Nəрма mndu ya, ka sanlaha, mnduha ta zadīṇta tsi, ka sanlaha.

13 Ma va tsaya ná, haḁ mndu ta klanṭá lwi ka gwada ta ghəṇa Yesu wu, kabga zləṇa la mali ta ghəṇa la Yahuda.

14 Dəgatá tsa fitikha ṇa skalu ya ka gragra ya ná, ka sli'aftá Yesu ka lamə da həga Lazglafta. Ka taghə tsi ta skwi ṇa mnduha mida.

15 Ka la Yahuda mantsa: «Taghaf ga na mndu na ta na ṇani ma skwi na na? Ya wya ta lagha a da vla taghaftá skwi wu, waka a sṇaṇtá skwi ma gwada Lazglafta mandana na?» ka həṇ ka ndərmimay.

16 Ka Yesu nda həṇ mantsa: «Ta sagha da mndu ta ghunigihatá skwi ta taghə yu, ta sabə da i'i a wa.

17 Ka fafa mndu ta ghəṇani ka maga skwi ta kumə Lazglafta, dza'a nda sna ka ta sagha da Lazglafta na skwi ta taghə yu na tsi, ka ta kla'ata ma ghəṇa ḁa a yu.

18 Mndu ta mna gwada ta ghəṇa ghəṇani ná, ghəṇani ta ghubu tsi. Mndu ta zba vlanṭá glaku ta mndu ya ta ghunafta, vərḁa mndu tsa mndu ya, ghwadaka mndu a wa.

19 Musa a ta vlaghunata zlahu wu ra? haḁ ya mataba ghuni ta maga slna nda tsa zlahu ya wa.

Ta zbə ɲaw kuni ta i'i ɲa dzata tama?» ka Yesu nda həŋ.

²⁰ Ka həŋ mantsa: «Nda ksa ka da halaway, wa ta zba kagha ɲa dzata na?» ka həŋ nda tsi.

²¹ Ka Yesu nda həŋ mantsa: «Turtuktuk yeya slna magan yu, ka ndərmim kuni nda ndərmima demdem.

²² Vlaghunavla Musa ta zlahu ɲa datsa fafaɗ, aŋ mndani Musa a ta zrafta wa. Daga ta dzidzi ta zrafta lu. Ta datsay a kuni ta fafaɗa zwani baɗu sabat rke?

²³ Ka si laviŋlava kuni ta tsa fafaɗa zwan baɗu Sabat, kabga yaha lu da ɓlanaptá zlahu Musa ya ní, kabgawu ta ɓasa kuni ta ɲufuf ta ghəŋa i'i, kabga vəl mbanafɗa ɗa ta mndu dzahuma' baɗu sabat tama?

²⁴ Ma tsə kuni ta guma wa iri, tsawa tsa ta guma manda ya ta raku,» ka Yesu nda həŋ.

Kristi ná, Almasihu ya

²⁵ Ka sanlaha ma mnduha la Ursalima mantsa: «Nana mndu na a ta zbə həŋ ɲa dzata kay ra? ka həŋ.

²⁶ Ngha ɓa ta platá vghani ta gwada, gwadanaf a lu wa. Ari tsatsaftsatsa a maliha mu kazlay: Kristi na mndu na kə'a kana?

²⁷ Aŋ mndani nda sna mu ta vli sabə tsi. Wya ka saghasa Kristi tani ná, haɗ mndu nda sna ta vli dza'a sabə tsi wu,» ka sanlaha ma mnduha la Ursalima guli.

²⁸ Ma tsa tagha skwi ta taghə Yesu ma daɓa həga Lazglafta ya, ka klanɗá tsi ta lwi dagala dagala. Ka'a mantsa: «Nda sna kaghuni ta i'i nda vli sabə yu dardar guli ra? Gagħəŋ gagħəŋa ɗa a sagha yu

wa. Vərda mndu tsa mndu ta ghunidikta ya. Tsaw sna a kaghuni tama ta tsa mndu ya wa.

²⁹ I'i, nda sna yu, kabga sagha da tsatsi i'i. Tsatsi ta ghunidikta,» ka Yesu.

³⁰ Kamkamkam, ka sanlaha ka kuma ksay. Sew had ya ta faftá dzvu tida wu, kabga ta sagha a fitikani karaku wa.

³¹ «Badu saghar Kristi ní, dza'a magay ta mazəməmə ka malaghutá ŋa na mndu na ri?» ka ndəghata sanlaha ma mnduha mataba tsa dəmga ya.

Ghunafta la Farisa ta mnduha ŋa ksafatá Yesu

³² Ka sniŋtá la Farisa ta tsa skwi ta mnə mnduha makdəkmakdək ta ghəŋa Yesu ya. Ka ghunaftá la mali ta ghəŋa gwal dra skwi ŋa Lazglafta, nda la Farisa ta gwal nŋa həga Lazglafta da ksa Yesu.

³³ Ka Yesu mantsa: «Ta teke'a nzda da kwitikw da kaghuni, kada vra yu da mndu ta ghunidikta.

³⁴ Dza'a zbay kuni ta i'i, slafta a kuni ta i'i wu, laviŋta a kuni ta b̄hata ma vli ta dza'a yu guli wu,» ka Yesu nda həŋ.

³⁵ Ka la Yahuda mantsa: «Dza'a laghu diga ŋa kwala mu kul slanaghata na? Dza'a laghu da taba la Yahuda ta widamtá vgha ma səla la Grek, ka tagha skwi ŋa la Grek rki na?

³⁶ Dza'a zbay kuni ta i'i, sladiŋhata a kuni wu, laviŋta a kuni ta b̄hata da vli ta dza'a yu guli wu, ka'a ná, nu klatá ghəŋa tsa gwadani ya na?» ka həŋ ta ghəŋani.

Mnay Yesu ta gwada ta Sulkum nda ghuḅa

³⁷ Badu kdavakta fitika tsa skalu ta nzakway ka mghama fitik ya, ka sli'aftá Yesu ka sladata,

ka gwadata nda lwi dagala. Ka'a mantsa: «Ka ta kuzlan'kuzla ndala ta mndu, ka sawi tsi da i'i da sa imi.

³⁸ “Ka zlg hafzlg ha mndu ta i'i katsi, dza'a mbəzagapmbəza dzuḅay ma ḡudufani.” Tsa imi ya ta vla hafu. Mantsa ya vindatani ma gwada Lazglafta,» ka Yesu.

³⁹ Tsaya ná, ta gwadə ta ghəḡa Sulkum dza'a tsu'u gwal dza'a zlg haftá tsatsi ta tsa gwada ya. Ta vla a lu ta Sulkum karaku ma tsa fitik ya wu, kabga ta kapanaf a lu karaku ta Yesu ma glakwani wa.

Kwala Yesu kul had ma fəlma mnduha

⁴⁰ Ka sanlaha mataba tsa dəmgə ya snəḡər həḡ ta tsa gwada ya mantsa: «Vərda anabi na mndu na,» ka həḡ.

⁴¹ «Kristi ya,» ka sanlaha. «Tsaw ma Galili dza'a saba Kristi rki?

⁴² “Ma zivra Dawuda ma luwa Batlehem ta nza-kway ka luwa Dawuda*” a dza'a saba Kristi, ka vindatani ma gwada Lazglafta kay ra?» ka sanlaha.

⁴³ Kidaghi gamndər ka tsa ndəghata mnduha ya dagavapta ta ghəḡa gwada ta Yesu.

⁴⁴ Kamkamkam, ka sanlaha ka kuma ksaftha, sew had ya ta faftá dzvu tida wa.

Ga rgha maliha la Yahuda

⁴⁵ Ka vraghutá tsa gwal ngə həga Lazglafta ya da slanaghatá tsa la mali ta ghəḡa gwal dra skwi ḡa Lazglafta nda la Farisa ya. Ka həḡ mantsa: «Nya kwal kuni ksakta na?» ka tsaha ya nda həḡ.

* **7:42** Ngə ta 2 Samuyel 7:12, Zabura 89:4-5, Irmiya 23:5, Mika 5:1.

⁴⁶ Ka həŋ mantsa: «Kay! Had mndu ta kdə walantá gwadaftá mndərga tsa gwađa ta gwadə tsa mndu ya wu,» ka həŋ nda tsa la Farisa ya.

⁴⁷ Ka la Farisa mantsa: «Nu! Nanafnana lu ta kaghuni guli 6a?

⁴⁸ Mamu mndu dər turtuk mataba la mali mali, nda ya mataba la Farisa ta zlghaftá tsa mndu ya ta nghə kaghuni ra?

⁴⁹ Tsa ndəghata mnduha ta zlghafta ta nghə kaghuni ya ná, sna a həŋ ta zlahá Musa wu, gwal nda ksi'a həŋ!» ka la Farisa nda həŋ.

⁵⁰ Ka Nikwademu ta nzakway mataba taŋ si ta sli'afta girvidik ka lagha slanaghatá Yesu ya kay nda həŋ mantsa:

⁵¹ «Ka ta dawap a lu ta gwadá da mndu, ka snaŋtá skwi maga tsi wu ná, ta gi tsanaghatá zlahá mu ta guma ta ghəŋani ra?» ka'a.

⁵² Ka həŋ mantsa: «Tekw kagha mataba la Galili guli ra? Dzaŋa ta gwadá Lazglafta 6a ka ngha ka, ka dza'a slanaghasla ka ta vli ta mna saba anabi ma Galili,» ka həŋ nda tsi. [

⁵³ Tahula tsa, ka gazlaghutá həŋ dzagha taŋ.]

8

Marakw ksaf lu ta hliri

¹ Ka sli'aftá Yesu ka laghwi ta ghwá Zaytuŋ.

² Wrək tgha ka vragatá tsi, ka lamə tsi da da6a həga Lazglafta, ka sli'adaghatá inda mnduha da tsi. Ka nzatá tsi nda nza ka tagha skwi ŋa taŋ.

³ Mbadá gwal tagha zlahu ŋa mnduha, nda la Farisa ka ksadaghatá sana marakw ksaf lu ta hliri. Ka kladamta da taba mnduha ka sladanata ta kəma Yesu.

⁴ Ka həŋ mantsa: «Mghama dá! Wana na marakw na ksaf lu ta hliri.

⁵ Mndərga na marakw na ná, z lambata nda pala, ka zlahá Musa mnaŋnata. Waka kagha nda ŋa gha na?» ka həŋ nda Yesu.

⁶ Tsaw ŋa tsanamtá matsavada, kada mutsafta həŋ ta rutsak tida lagha həŋ mna tsa gwađa ya ŋani. Lagha Yesu ka dzamtá ghəŋ ka vinda skwi ta hadik nda ndəfiŋa dzvu.

⁷ Ka gđavatá həŋ ka va đaway da tsi. Ka Yesu mantsa: «Ka waya mataba ghuni kul walaŋta gatá dmaku ya, ka zlrəfzlrə tsi ta wuda na marakw na nda pala,» ka'a kapaŋtá ghəŋ.

⁸ Ka dzəglamtá tsi ta ghəŋ ka vindgəltá skwi ta hadik.

⁹ Tahula snaŋta taŋ ta tsa gwađa Yesu ya, ka gazlaghatá həŋ turtuk turtuk, zlrəfta ta la galata mnduha ha ka saha ta zwani. Ka zlaŋtá həŋ ta Yesu turtukwani nda tsa marakw ya ta sladu ta kəmani.

¹⁰ Kə'a ka Yesu kapglaŋtá ghəŋ ná, tsa marakw yeya nghan tsi. Ka Yesu mantsa: «A', gazlagha diga həŋ kay ní makwa na? Had mndu ta tsaghagha ta guma kay ra?» ka'a nda tsi.

¹¹ Ka tsa marakw ya mantsa: «Had mghama dá wa,» ka'a. Ka Yesu mantsa: «Tsa a i'i ta guma ta ghəŋa kagha guli wa. La! Yaha ka magəgəltá dmaku,» ka'a nda tsi.

Yesu tsuwadaka ghəŋa hadik

¹² Ka Yesu nda həŋ guli mantsa: «I'i tsuwadaka ghəŋa hadik, mndu ta dza'a mista dá ná, had dza'a mbađa ma grusl wu, dza'a mutsay ta tsuwadaka hafu,» ka'a.

13 Ka la Farisa mantsa: «Ghuba ghəŋa gha ta ghubu ka, vərđa gwada a na gwada gha na wu,» ka həŋ ta ghəŋani.

14 Ka Yesu nda həŋ mantsa: «Dər má ghuba ghəŋa da ta ghubu yu ná, vərđa gwada ya ta mnə yu, kabga nda sna yu ta vli sagha yu nda vli ta dza'a yu. Tsaw kaghuni ya ná, sna a kuni ta vli sagha yu, nda vli ta dza'a yu wa.

15 Kaghuni ná, guma wa iri ta tsə kuni. I'i, tsa a yu ta guma ta ghəŋa mndu wa.

16 Ala ka tsatsa yu ta guma katsi, vərđa guma na guma da, kabga turtukwa da a yu wu kawadaga ŋni nda Da ta ghunigihata.

17 Nda vinda ma zlahə ghuni kazlay: Ka nda guya gwada mnduha his ta va tsa skwa turtuk ya katsi ná, kahwathwata nzakwa tsa gwada ya* kə'a.

18 Ghuba ghəŋa da ta ghubu yu mndani, ta ghuba i'i Da da ta ghunidfikta guli,» ka'a nda həŋ.

19 «Ga Da gha na?» ka həŋ nda tsi. Ka Yesu mantsa: «Sna a kuni ta i'i wu, sna a kuni ta Da da guli wa. Ka má nda sna kuni ta i'i ná, má nda sna kuni ta Da da guli,» ka'a nda həŋ.

20 Ta tagha skwi ma dađa həga Lazglafta mna tsi ta tsa gwadaha ya, ta nzaku ndusa nda vla pgha tsemi. Sew had mndu ta faftá dzvu tida wu, kabga ta sagha a fitikani wa.

Mnaŋta Yesu ta sli'ani da dani

21 Ka Yesu mantsa: «Dza'a laghula yu, dza'a zbay kuni ta i'i. Dza'a rwaku kuni ma dmaku, laviŋta a kuni ta fhata ma tsa vli ta dza'a yu ya wu,» ka'a nda həŋ guli.

* **8:17** Ngha ta Vrafta ta Zlahu 17:6, 19:15.

22 Ka la Yahuda mantsa: «Vghani rki dza'a tsi dzuvta kəl tsi ka mnay kazlay: Laviŋta a kuni ta ɓhata da tsa vli ta dza'a yu ya wu kə'a na?» ka həŋ ta ghəŋa tsa gwadani ya.

23 Ka Yesu mantsa: «Gwal ta ghəŋa hadik kaghuni, la ta luwa i'i, ŋa gwal ta ghəŋa hadik kaghuni, ŋa na ghəŋa hadik na a i'i wa.

24 Tsaya tsa kəl yu ka mnay ŋa ghuni kazlay: Dza'a rwaku kuni ma dmakuha ghuni kə'a ya. Dza'a rwaku kuni ma dmakuha ghuni ka si zlgħa a kuni kazlay: "I'i ná, i'i ya kə'a ya wu,"» ka'a nda həŋ.

25 Ka həŋ nda tsi mantsa: «Wa kagħa katək na?» ka həŋ. Ka Yesu nda həŋ mantsa: «Tsa i'i mnaghuna yu daga taŋtaŋ ya, ya.

26 Ta traku skwiha ŋa mnay dā ta kaghuni, ka tsaghunagħatá guma. Tsa mndu ta ghunigihata ya ná, vərda mndu ya. Skwi snaŋ yu dā tsi ta mnə yu ŋa mnduha ta ghəŋa hadik,» ka'a nda həŋ.

27 Sew sna a həŋ kazlay: Ta gwadə ta Da na Yesu ta tsa gwadā ya kə'a wa.

28 Ka Yesu nda həŋ mantsa: «Badu kapadafta ghuni ta Zwaŋa mndu ya, badu tsaya dza'a snaŋta kuni "ta i'i." Badu tsaya guli dza'a snaŋta kuni kazlay: Gaghəŋgaghəŋa dā a ta maga yu ta skwi wu, manda ya tagħadif Da ta mna yu ta gwadā dā† kə'a.

29 Tsa mndu ta ghunifikta ya ná, kawadaga ŋni nda tsi. Turtukwa dā a zlihata tsi wu, kabga ta maganamaga yu ta skwi ta zdəganata inda fitik,» ka'a.

30 Ta gwadə Yesu ta tsa gwadaha ya ná, nda ndəgha gwal ta zlgħafta.

† 8:28 Ngha ta Yuhwana 3:14.

Da Lazglafta ta sagha kahwathwata

³¹ Ka Yesu nda tsa la Yahuda ta zlglafta ya mantsa: «Ka gđavagđa kuni ma skwi ta taghə yu ŋa ghuni katsi, nda nza kuni ka vərđa duhwalha đa.

³² Dza'a nda sna kuni ta kahwathwata, ŋa vlaghunata tsa kahwathwata ya ta nzaku nda platá vgha,» ka'a

³³ Ka la Yahuda mantsa: «Zivra Abraham aŋni, ta walaŋ a aŋni ta nzata ka vu'a mndu wa. Ta wu ŋa mnay gha kazlay: Dza'a plaku vgha ghuni kə'a na?» ka həŋ nda tsi.

³⁴ Ka Yesu nda həŋ mantsa: «Kahwathwata ta mnaghunata yu, inda mndu ta ga dmaku ná, nda nza ka vu'a dmaku.

³⁵ Hađ vu'a ta gđavata ma həga ga mndu wu, zwaŋ yeya ta gđavata ŋa đekđek.

³⁶ Ka zwaŋ ta plighunista katsi ná, falau' vgha ghuni kahwathwata.

³⁷ Nda sna yu kazlay: Zivra Abraham kuni kə'a, ama wana kuni ta psa i'i ŋa dzata, kabga tsu'a a kuni ta gwađa đa wa.

³⁸ Skwi nghan yu da Da đa ta mnə yu. Kaghuni, skwi taghaghunaf da ghuni ŋa ghuni ta magay,» ka'a

³⁹ Ka həŋ nda tsi mantsa: «Abraham da ŋni ta aŋni,» ka həŋ. Ka Yesu nda həŋ mantsa: «Ka má vərđa zwana Abraham kuni katsi ná, má mndərga slna Abraham ta magə kuni.

⁴⁰ Wana ndanana ná, ta zba dzata i'i ta mnaghunata kahwathwata skwi ya snaŋ yu da Lazglafta kuni. Ta walaŋ a Abraham ta magatá mndərga tsaya wa.

⁴¹ Kaghuni ná, slna da ghuni ta magə kuni,» ka'a

nda həŋ. Ka həŋ mantsa: «Masagwa a aŋni wa. Turtuktuk Da ŋni ta nzakway ka Lazglafta,» ka həŋ.

⁴² Ka Yesu nda həŋ mantsa: «Ka si Lazglafta vərda da ghuni katsi ná, má dza'a dvuɔva kuni ta i'i. Sli'af da Lazglafta i'i ka sagha, gaghəŋgaghəŋa da a sagha yu wa. Tsatsi ta ghunigidaghata.

⁴³ Laviŋ a kuni ta snaŋta gwada da wu, kabga kwala ghuni kul fatá sləməŋ ka sna skwi ta mnaghunata yu.

⁴⁴ Da ghuni ná, halaway ya. Ta kumay kuni ta maganata skwi ta zdəganata. Nda nza tsatsi ka mnda dzata mndu daga ma zrafta. Ta walaŋ a ta sladafta ta kahwathwata wu, kabga had kahwathwata da tsi wa. Vərda ŋani ma gwada ta gwadagapta ná, tsakalawi ya, kabga tsakalawi tsata fwa tsatsi. Dani ma tsakalawi tsatsi guli.

⁴⁵ I'i, tsu'a a kuni ta i'i, kabga mnay da ta kahwathwata wa.

⁴⁶ Waya mataba ghuni dza'a mnihata kazlay: Ta6 magamaga ka ta dmaku dər turtuk səla kə'a nda i'i na? Ka si kahwathwata ta mnə yu, kabga wu kwal kuni zlghay na?

⁴⁷ Mndu ya nda nza ka ŋa Lazglafta ná, ta snay ta gwada Lazglafta. Kaghuni, sna a kuni ta gwada Lazglafta wu, kabga nza a kuni ka ŋani wu,» ka Yesu nda həŋ.

I Yesu nda Abraham

⁴⁸ Ka la Yahuda mantsa: «Ta ŋaŋni a ta mnay kazlay: Mnda la Samari kagha, nda ksa ka da halaway kə'a kay rke?» ka həŋ nda tsi.

49 Ka Yesu mantsa: «Ksa a yu da halaway wa. Glaku ŋa da ta vlay ŋa Da da, ka mbidata kaghuni ta i'i.

50 Zba vlanťá glaku ta ghəŋa da a ta zbə yu wa. Turtuk tsa mndu ta zba tsa glaku ya ŋa da, tsatsi ta tsa guma guli.

51 Kahwathwata ka yu ta mnaghunata, mndu ta snatá skwi ta taghə yu, had dza'a mtuta dekdek wa,» ka'a nda həŋ.

52 Ka la Yahuda nda tsi mantsa: «Ndanana grafta ŋni kazlay: Nda ksa ka da halaway kə'a. Mtumta Abraham, rwurwa la anabi guli. “Ka snasna mndu ta skwi ta taghə yu ná, had dza'a mtuta dekdek wu,” ka ka ná,

53 mal kagha ka tsa da ŋni Abraham ta mtuta ya ra? Ari mal kagha a ka tsa anabiha ta rwuta ya na? Wa i'i ka kagha ta gray na?» ka həŋ.

54 Ka Yesu nda həŋ mantsa: «Ka vla glaku ta vlə yu ŋa ghəŋa da katsi ná, bətbət tsa glakwa da ya. Da da ta vlihatá glaku, tsa ta mnə kaghuni kazlay: Má Lazglafta ŋni ya kə'a

55 kul snanťa kuni ya. I'i nda sna yu ta tsatsi. Ka má sna a yu wu ka yu mazlay katsi ná, má dza'a nzakway yu ka guram nda kaghuni ta tsakalawi ya. Tsaw nda sna i'i ta tsatsi, ta snay yu ta gwadani guli.

56 Harharhar ghəŋa Abraham ta ghəŋa vəl ndanayni ta dza'ani nghanťá fitika da. Ka nghanťá tsi, ka tuta tsi da rfu,» ka Yesu nda həŋ.

57 Ka la Yahuda mantsa: «Ta maga a ima gha hutaf mbsak ná, gi nda ngha yu ta Abraham ka ka?» ka həŋ nda tsi.

58 Ka Yesu mantsa: «“Kahwathwata ka yu ta

mnaghunata, makəḏ lu ka Yatá Abraham ná, mamu i'i,"» ka'a nda həŋ.

⁵⁹ Na mnatani ta tsaya, ka hlaftá həŋ ta pala ŋa zlartsay. Ka difaghutá Yesu, ka saghu tsi da daḡa həga Lazglafta.

9

Mbanafta Yesu ta sana ghulpata mndu

¹ Ta labə Yesu ta tvi, ka nghanṭá tsi ta sana mndu nda ghulpa daga ta yagatá lu.

² «Maləma ḡa! Wana nda ghulpa na mndu na daga ta yagatá lu. Tsatsi re, dadahani a ta gatá dmaku katək na?» ka duhwalhani ḡawaṅta da tsi.

³ Ka Yesu mantsa: «Ta ghəŋa dmakwani a ghulpəta tsi wu, ta ghəŋa dmakwa dadahani a guli wa. Ghulpgahulpa ŋa maravata slna Lazglafta nda ma tsatsi.

⁴ Ta ka fitik vəl na ná, magamamaga ta slna mndu ya ta ghunigihata. Wana vli dza'a kuzuta ŋa kwal kul laviṅta ksəgəltá slna.

⁵ Tata ghəŋa hadik na yu karaku ná, i'i tsuwadaka ghəŋa hadik,» ka Yesu.

⁶ Tahula mnatani ta tsa gwada ya, ka tfatá tsi ta sərdək, ka hwada'atá hadik nda tsi, ka masanafta ta kwapaya irihani.

⁷ Manda kdīṅtani ta masanaftá, ka'a nda tsi mantsa: «La mbaziṅta kuma gha ma ima Silwe,» ka'a. Tsa «Silwe» ya ná, manda mnay kazlay: Ghunay kə'a ya.

Ka sli'aftá tsi ka laghwi mbaziṅtá kumani. Mbaziṅtani, tsidid irani, ka sli'aftá tsi ka laghu dzaghani.

⁸ «Na mndu ta nzata ka gatá skwi da mnduha ya a na mndu na kay ra?» ka sləvdahani si ta gđata ta nghan̄ta ta gatá skwi ya.

⁹ «Tsatsi ya» ka sanlaha. «Tsatsi a wu, sana mndu ya ta gara vgha nda tsatsi,» ka sanlaha guli. Ka tsa mndu ya mantsa: «Aŋ! vada ya,» ka'a.

¹⁰ «Waka ka magay kəl ka ka nghan̄tá vli 6a?» ka həŋ nda tsi.

¹¹ «Sana mndu ya ta hgə lu ka Yesu, ta hwađa'atá hadik, ka masadiftá tsi ta kwapaya iriha da. "La mbaziŋtá kuma gha ma ima Silwe," ka'a nda i'i, ka sli'aftá yu ka laghwi yu mbaziŋta, kəl yu ka nghan̄tá vli,» ka'a.

¹² «Ga tsa mndu ya ndana?» ka həŋ nda tsi. «Sna a i'i wa,» ka'a nda həŋ.

Dawutá vla la Farisa da tsa mndu si nda ghulpa ya

¹³ Ka klaftá həŋ ta tsa mndu si nda ghulpa ya, ka klaghata da la Farisa.

¹⁴ Tsaw bađu Sabat hwađa'ata Yesu ta tsa hadik ya, ka masanaftá tsa mndu ya ta kwapaya irihani ka mbanaftha ya.

¹⁵ Ka dawgəltá la Farisa da tsi kə'a magaku kəl tsi ka nghan̄tá vli. Ka'a mantsa: «Hadik hwađa a tsi, ka masadifta ta kwapaya iriha da. Ka mbaziŋta yu ta kuma da, kəl yu ka nghan̄tá vli,» ka'a nda həŋ.

¹⁶ Ka dgavaptá la Farisa his gamndəŋ. «Mnda Lazglafta a tsa mndu ya wu kabga sna a ta skwi ta mnə zlahā sabat wu,» ka sanlaha. «Waka mnda dmaku dza'a maga mndərga tsahaya ma mazəməzəmə na?» ka sanlaha, ka həŋ ta ghəŋani.

17 Ka həŋ nda tsa mndu ya mantša: «Wa tsa mndu ta mbaghafta ya ka kagha ta gray na?» ka həŋ ka mahis nda tsi. «Anabi ya,» ka'a nda həŋ.

18 Ta lanaf a ta la mali ta ghəŋa la Yahuda na mnay kazlay: Si nda ghulpa tsa mndu ya, ka nghanťá tsi ta vli kə'a wa. Ka laghu həŋ hgaktá dadaha tsa mndu ya. Ka sagha həŋ.

19 Manda sagha taŋ, «zwanja ghuni na mndu na ra? Grafgra kuni kazlay: Nda ghulpa ta yagata kuni kə'a ra? Waka a magaku kəl tsi ka nghanťá vli ndana 6a?» ka həŋ nda həŋ.

20 Ka dadahani mantša: «Nda sna aŋni kazlay: Zwanja ŋni ya kə'a. Ta yagatá ŋni guli ná, nda ghulpa.

21 Tsaw sna a aŋni kə'a magaku kəl tsi ka nghanťá vli wa. Dawawadawa da tsi, nda gla tsatsi prək ka zlgħawani tsatsi ka ghəŋani,» ka həŋ.

22 Ta zləŋay tsa dadahani ya ta la maliha ta ghəŋa la Yahuda, kəl həŋ ka mnay mantša. Tsaw la mali ta ghəŋa la Yahuda ya ná, nda ghada dzrafta taŋ. Mndu ta mnay kazlay: Yesu ná Kristi ya kə'a ná, dza'a talintala lu ta tsa mndu ya ma həga tagha skwa mu kə'a.

23 Tsaya kəl dadahani ka mnay kazlay: Nda gla tsatsi, prək tsatsi ka ghəŋani ka zlgħawani kə'a ya.

24 Ka hgəglanťá la Farisa ta tsa mndu ya kamahis. Ka həŋ nda tsi mantša: «Mna kagha ta kahwathwata ta kəma Lazglafta. Aŋni ná, nda sna aŋni kazlay: Mnda dmaku tsa mndu ya kə'a,» ka həŋ.

25 Ka tsa mndu ya mantša: «Ka mnda dmaku tsi, ka mnda dmaku a tsi wu, sna a i'i wa. Skwi turtuk

ya snaŋ i'i ná, si nda ghulpa yu, ndanana nda ngha yu ta vli tsidíd,» ka'a nda həŋ.

²⁶ «Waka a magaghata kəl ka ka nghanťá vli ka ka?» ka həŋ nda tsi.

²⁷ «Ghadaghada yu ta mnaghunata, va a kuni ta snay wu. Nu ta kumə kuni ta mnəglaghunata đa tama, ari ta kumay a kaghuni ta nzakway ka duhwalhani guli na?» ka'a nda həŋ.

²⁸ Ka rarazə həŋ. Ka həŋ mantša: «Ba kagha ta nzakway ka duhwalani wala, aŋni ná, duhwalha Musa aŋni.

²⁹ Nda sna amu kazlay: Gwadgana gwada Lazglafta ta Musa kə'a. Tsa mndu ya, sna a aŋni ka sagha ga tsi wu,» ka həŋ.

³⁰ Ka tsa mndu ya mantša: «Wanawa mandərmimi kay tama! Sna a kuni ta vli ka ga sagha tsi wu? Wana gunihaguna ta ira i'i tada tsa.

³¹ Skwi ya snaŋ amu ná, zlgħa a Lazglafta ta wa skwi ta đawu mnda dmaku wa. Mndu ya ta vla glaku ŋani, ta snanató ŋani, ta zlgħə tsi ta wani.

³² Ka yawu ta sna a lu ta mnay kazlay: Mamu mndu ta gunanató ira mndu yaga lu nda ghulpa kə'a wa.

³³ Ka si nza a tsa mndu ya ka mnda Lazglafta wu ná, má had sana skwi laviŋ tsi ta magata wa,» ka'a nda həŋ.

³⁴ Ka həŋ nda tsi mantša: «Kagha yaga lu ka dmaku dze'dze' guli ná, ka taghəgəltá skwi ŋaŋni,» ka həŋ, ka ghzlagapta ma həga tagha skwa taŋ.

Vərdaka ghulpata mndu

³⁵ Manda snaŋta Yesu kazlay: Ghzlagap ghzla lu ma həga tagha skwa la Yahuda kə'a, ka lagha tsi

slanaghata. Ka'a mantsa: «Zlghafzlgħa ka ta Zwanja mndu ra?» ka'a nda tsi.

³⁶ Ka tsa mndu ya mantsa: «Waya ní mghama da! Mnihamna ka zlghafta yu,» ka'a nda tsi.

³⁷ «Vani na ta nghə ka, ta gwada nda kagha na,» ka Yesu nda tsi.

³⁸ «Zlghafzlgħa yu mghama da,» ka'a tsəlbata ka ndəba dzvu ŋani.

³⁹ Ka Yesu mantsa: «Sasa yu ta na ghəŋa hadik na ŋa dganatá nzakwa mnduha. Ŋa nghanja gwal kul nghanjá vli, ta vli. Ta ghulpəta gwal nda ngha ta vli,» ka'a.

⁴⁰ Ka sanlaha ma la Farisa hada mantsa: «Dza'a ghulpghulpa aŋni guli ra?» ka həŋ nda tsi manda snanja tan ta tsa gwadaha ya.

⁴¹ Ka Yesu nda həŋ mantsa: «Ka má ghulpghulpa kuni katsi ná, má had dmaku ta kaghuni wa. Tsaw “nda ngha aŋni ta vli,” ka kuni ndanana ya, tsaya kəl dmakwa ghuni ka gдавata,» ka'a nda həŋ.

10

Yesu vərda mnda ngha tuwak

¹ Ka Yesu mantsa: «Kahwathwata ka yu ta mnaghunata, mndu ta kwal kul lami nda ta watgha gamaka tuwakha, ka valadata nda ta muhul ná, ghali tsa mndu ya, gənda tsa mndu ya guli.

² Ala ka lami nda ta watgha tsa mndu ya katsi, mnda ngha tuwakha tsa mndu ya.

³ Dza'a gunanaguna mnda ngha tsa həga ya ta watgha, dza'a nda sna tuwakha ta lwani, ŋa hgayni ta tuwakhani nda hga tan nda hga tan. Ŋa zligintani ta həŋ dzibil.

⁴ Zligiŋtani ta inda tuwakha ta nzakway ka ŋani ya, ŋa dza'ani ta kəma taŋ, ta dza'a hahəŋ mistani. Ta dza'a tuwakhani mistani, kabga nda sna hahəŋ ta lwani.

⁵ La a həŋ mista mndu kul snaŋtá həŋ wu, dza'a hwayaghuhwaya həŋ di'inj nda tsi, kabga tsatsaf a həŋ ta lwani wa.»

⁶ Mantsa ya ka Yesu mnanatá mahdihdi ta həŋ, sew sna a tsa mnduha ta snay ya ta ghəŋa tsa skwi ta mnə tsi ya wa.

Yesu vərda mnda ngha tuwak

⁷ Ka Yesu nda həŋ guli mantsa: «Kahwathwata ka yu ta mnaghunata, i'i watgha gamaka tuwakha.

⁸ Inda gwal ta sagha ka tiŋlaghutá i'i, ghali tsaha ya, gənda həŋ guli. Ama ka kwalaghutá tuwakha ta sna lwa taŋ.

⁹ I'i watgha gamaka tuwak, ka lamla mndu nda ta i'i, dza'a mbaku. Dza'a laviŋlava ta lami ka sabi, ŋa mutsaftani ta skwa zayni.

¹⁰ Mndu ta ghali ná, ghali ŋani ta sagha da ghalay, ŋa dzata, ŋa zadánata. I'i ná, saghasa yu ŋa mutsafta mnduha ta hafu ka haslay, ŋa nzakwa taŋ kul had sana skwi ta pɸugudunustá həŋ.

¹¹ I'i vərda mnda ngha tuwak, vərda mnda ngha tuwak ná, nda fa vghani ŋa tuwakhani.

¹² Mndu ta ngha tuwak ta plə lu nda pla ŋani ná, ŋani a tuwakha wu na, nghayni ta kramtak mtak ta sagha ya ná, hwayaghutani ka zlanavatá tuwakha, ŋa valafta kramtak mtak ta tuwakha, ka kwitanatá həŋ.

¹³ Tsaya skwi ta magə mndu ta maga slna ŋa tsemi, had daŋwani nda tuwakha wa.

14 I'i ná, vərđá mnda ngha tuwak yu, nda sna yu ta tuwakha đá, hahəŋ guli nda sna hahəŋ ta i'i,

15 manda va ya snaŋ Da ta i'i ya, i'i guli ná, nda sna yu ta Da, nda fa vgha đá guli ŋa tuwakha đá.

16 Mamu sanlaha ma tuwakha đá guli, kul had ma na gamak na. Dza'a nda sna həŋ ta lwa đá, ŋa hlaktá đá ta həŋ, ŋa nzata taŋ tuts, turtuk mndu ta ngha həŋ.

17 Dvudva Da ta i'i, kabga fafa yu ta vgha đá ŋa mtuta, ŋa mutsəglafta đá.

18 Had mndu ta laviŋtá klaptá hafu ma i'i wu, i'i ka ghəŋa đá ta vlata. Laviŋlava yu ta vlata, laviŋlava yu ta mutsəglafta. Tsaya skwi dza'a ka magay ka Da đá nda i'i.»

19 Ka dagəglavaptá la Yahuda kidaghi gamndər ta ghəŋa tsa gwada ya.

20 Ka sanlaha ma həŋ mantsa: «Mamu duhwala halaway ma na mndu na, nda ksa da halaway, ŋaw ta sna kuni ta gwada ta gwadə tsi na?» ka həŋ.

21 «Had mndu nda ksa da halaway ta gwada manda tsaya wu, laviŋlava duhwala halaway ta gunana ta iri ta mnduha ra?» ka sanlaha guli.

Zlghafa sanlaha ta Yesu wa

22 Ma fitika mazlam, ka skalə lu ta skala havaktá guna həga Lazglafta ma Ursalima.

23 Mbađa Yesu ka wawaku ma rmak ta wa tsa həga Lazglafta ta hgə lu ka rmaka Salumuŋ ya.

24 Ka lagha la Yahuda wanafta ddivis. Ka həŋ nda tsi mantsa: «ŋa kulam yawu dza'a zlaŋnata ka ma dga ghəŋ ta dgə ŋni na? Ka kagha ta nzakway ka Kristi ya kay, mnaŋna ka dardar 6a?» ka həŋ nda tsi.

²⁵ Ka Yesu nda hən̄j mantsa: «Mnaghunamna yu, zlg̃ha a kuni wa. Na sl̄naha ta magə̃ yu nda hga Da d̄a na ta mn̄antá i'i,

²⁶ zlg̃ha a kuni wu kabga hađ kuni mataba tuwakha d̄a wa.

²⁷ Nda sna tuwakha d̄a ta lwa d̄a. I'i nda sna yu ta hahən̄j, ta dza'a hən̄j mista d̄a guli.

²⁸ Ta v̄lan̄v̄la yu ta hafu ŋa k̄dekeden̄j ta hən̄j. Hađ hən̄j dza'a walaŋta zwađuta wu, hađ m̄ndu dza'a hlaptá hən̄j ma dzva d̄a guli wa.

²⁹ Tsa Da d̄a ta v̄liha ta hən̄j ya, malaghumala ta inda sanlaha. Hađ m̄ndu dza'a lav̄iŋtá hlaptá hən̄j ma dzva Da d̄a wa.

³⁰ Aŋni nda Da d̄a ná, ka skwa turtuk ŋni,» ka'a nda hən̄j.

³¹ Lagha la Yahuda ka hləglaftá pala ŋa zl̄ertsay.

³² Ka Yesu nda hən̄j mantsa: «Wya nda ndəgha sl̄na d̄inad̄ina si da Da d̄a magaghuna yu, ta ghəŋa wati ta kuma kuni ta zl̄erts̄a i'i na?» ka'a nda hən̄j.

³³ Ka hən̄j mantsa: «Ta ghəŋa magata gha ta skwi d̄ina a ta zl̄erts̄a ŋni ta kagha wu, ta ghəŋa v̄l̄ kwarakwara gha. Kagha ta nzakway ka m̄nda s̄ela ná, ta gra ghəŋa gha ka nda Lazglafta,» ka la Yahuda nda tsi.

³⁴ Ka Yesu nda hən̄j mantsa: «Vinda a ma deftera z̄laha ghuni ma v̄la m̄nay Lazglafta kazlay: Kaghuni ná, "lazglaftaha" kuni* kə'a kay ra?

³⁵ Nda sna mu kazlay: Hađ m̄ndu dza'a lav̄iŋtá h̄erd̄iŋta skwi nda vinda ma deftera Lazglafta wu kə'a. Tsaw lazglaftaha kuni ka Lazglafta tsanaftá hgu ta m̄nduha ta mn̄ə tsi ta gwad̄ani ŋa taŋ.

* **10:34** Ngha ta Zabura 82:6.

³⁶ Ii, Da ta zbaptá i'i, ka ghunigihata ta ghəŋa hadik, waka kuni dza'a mnay kazlay: Ta kwarakwara ka kə'a kabga mnay da kazlay: Zwaŋa Lazglafta yu kə'a?

³⁷ Ka slna Da da a ta magə yu ta nghə kuni wu, ma zlghaf kuni ta i'i.

³⁸ Ala ka si vani tsi ta magə yu katsi, dər má zlghaf a kuni ta i'i wu, zlghafwazlgha a ka tsa slnaha ya, kada grafta kuni, ŋa snanŋa ghuni kazlay: Da ta nzaku ma i'i, i'i ma Da guli kə'a,» ka Yesu nda həŋ.

³⁹ Ta ghəŋa tsaya ka zbəgəltá həŋ ta ksaf, ka zadanaŋhatá tsi rək ta həŋ.

⁴⁰ Ka vrəglaghutá Yesu ta 6la ghwa Zurdeŋ, ma vla tanŋaŋa magay Yuhwana ta batem ŋa mnduha, ka nzatá tsi hada.

⁴¹ «Had mazəmzəm dər turtuk maga Yuhwana wa. Tsaw inda skwi ya mna Yuhwana ta ghəŋa na mndu na ná, manda va tsaya nzakwani, ka ndəghata mnduha ta sli'adaghata da tsi ta mnay.»

⁴² Ma tsa vli ya, nda ndəgha gwal ta zlghaftá Yesu.

11

Mtakwa Lazar

¹ Mamu sana mndu ma luwa Betani Lazar hgani ksaf danwa. Ma tsa luwa ya ta nzakwa kwaghamani ta nzakway ka i Mari nda Marta.

² Tsa Mari ya tsa ta pghanaftá urdi ta səla ta Mgham Yesu ka takaday nda swida ghəŋani ya. Zwanamani tsa Lazar kul dughwanaku ya guli.

³ Ka tsghaghatá tsa kwaghamani ya ta lwi ŋa Yesu kazlay: Mghama da, dughwana a tsa gra gha ya kay wu kə'a.

4 Ka Yesu mantsa: «Dzata a tsa danwa ya ta Lazar wa. Na marantá glakwa mbrakwa Lazglafta tsa danwani ya, kada maravata glakwa Zwanja Lazglafta guli,» ka'a manda snantani ta tsa gwada ya.

5 Tsaw ta dway Yesu ta i Marta nda mukumani nda Lazar.

6 Tahula tsa snanta Yesu kazlay: dughwana a Lazar wu ka'a ya, ka magəglatá tsi ta fitik his, ma tsa vli hada tsi ya.

7 Tahula tsa, «vramavra ta hadika Zudiya,» ka'a nda duhwalhani.

8 «Maləma da, kdakwa la Yahuda tsa ta kuma zlertsa ta kagha nda pala na dzata ná, vramavra ta hadika Zudiya ka ka?» ka duhwalhani nda tsi.

9 Ka Yesu mantsa: «Ghwanpdə his a nzemndi ma vaghu ra. Ka ta mbadə gifitik mndu ta mbadə ná, had tuthun, ta dzadzay wu, kabga tsuwadək vli ta wa irani gifitik.

10 Ala ka girvidik ta mbadə mndu ta mbadə katsi, ta dzadzay tuthun, kabga ngha a ta vli girvidik wu,» ka Yesu nda həŋ.

11 «Wa a dzadza hani ta gra mu Lazar, ka la yu da sli'anafta,» ka'a nda həŋ tahula mnatani ta tsa gwada ya.

12 «Mghama da! ka si hani ta dzata ya ní, had dza'a mbafta ra?» ka duhwalhani nda tsi.

13 Ba va hani ta dzata kahwathwata ka hahəŋ sizlay nda na tan. Tsaw ta ghəŋa mtatani mna Yesu ta nani.

14 Ka Yesu klinistá ghəŋani ta həŋ mantsa: «Nda mta Lazar tane!

15 Ta rfu yu ta ghəŋa kwala da kul had hada. Dina tsaya ka na ghuni, na fafta ghuni ta ghəŋ ta i'i.

Mbadma slanaghata ndana tama,» ka'a nda hən.

¹⁶ «Mbadma amu guli, ka dza'a mu rwuta kawadaga nda tsi,» ka Tuma ta hgə lu ka mbuhwali nda pdakwa duhwalha.

Yesu hafu

¹⁷ Ta lagha Yesu ná, mafwada fitika Lazar tsa ma hadik manda padamta.

¹⁸ Tsa luwa Betani ya, malaghumala a ka meli hkən nzakwani nda luwa Ursalima wa.

¹⁹ Nda ndəgha la Yahuda ta sli'adaghata da zgananta i Marta nda Mari, ta ghəŋa mtatá zwanama tan.

²⁰ Manda snanta Marta kazlay: Wa'a Yesu ta sagha kə'a, ka labə tsi da guyay ta tvi, ta nzutá nzakwani Mari mintgha.

²¹ Ka Marta nda Yesu mantsa: «Mghama da! Ka má hadna ka katsi ná, má mta a zwanama da wa.

²² Tsaw dər nda vanana ná, nda sna yu kazlay: Inda skwi dza'a ka dawanta da Lazglafta ná, dza'a tsu'aghaf tsu'a Lazglafta ta wani kə'a,» ka Marta nda Yesu.

²³ Ka Yesu mantsa: «Dza'a sli'agapsli'a zwanama gha ma mtaku,» ka'a nda tsi.

²⁴ «Nda sna yu mantsa kazlay: Dza'a sli'agapsli'a ma mtaku badu kdakwa ghəŋa hadik kə'a,» ka Marta nda tsi.

²⁵ Ka Yesu nda tsi mantsa: «I'i tsa mndu ta sli'aganaptá gwal nda rwa ŋa nzəglata tan nda hafu ya. Mndu ta zlglaftá i'i dər mtumta tsi, dza'a nzanza nda hafu.

²⁶ Dər wati ma mndu ka ta ndiri tsi ta zlglaftá i'i had dza'a mtuta dekdek wa. Zlglafta zlglafta ka ta tsa?» ka Yesu nda tsi.

²⁷ Ka Marta nda tsi mantša: «Añni mghama da, zlg hafzlg ha yu kazlay: Kagha ná, Kristi Zwanja Lazglafta ya dza'a saha ta ghəŋa hadik ka,» ka'a nda tsi.

Tawa Yesu ta ghəŋa mta ta Lazar

²⁸ Mnatani ta tsa gwada ya, ka sli'afta tsi ka laghwi mnanata mukumani Mari makdek makdek kazlay: Wa'a tsa mndu ta taghamata skwi ya kay hadna ta gvala kagha, ka'a.

²⁹ Na gi snaŋta Mari mantša ya, gi brahwat sli'afta, ka hwaya slanaghatata Yesu.

³⁰ Tsaw ta lamə a Yesu da luwa karaku wu, tata nzaku ma tsa vla guyakwa taŋ nda Marta ya.

³¹ Nghay tsa la Yahuda ta nzaku ma həga ta lba ŋuduf ŋa Mari ta tsa gi sli'aftani brahwat ka sli'i dzibil ya, ka həŋ mantša: Ya sli'ani da taw ta kulu tsa, ka həŋ ka sabi mistani.

³² «Mghama da! Ka ma hadna ka ná, ma mta a zwanjama da wu,» Ka Mari zləmbatata ma ghuva Yesu nghanər tsi manda bhadaghatani da tsa vli nda tsi ya.

³³ Nghay Yesu ta Mari ta taw, nda tsa la Yahuda ta labə mistani ya tani, ka lagha tsi ta ŋudufa Yesu ka kbanafta.

³⁴ «Ga padamta kuni na?» ka'a nda həŋ. «Mghama da! Sawi nghanata ba,» ka həŋ nda tsi.

³⁵ Ka mbəzə Yesu ta ima taw.

³⁶ «Nghawa ka'a ta dvay ba!» ka la Yahuda ta ghəŋani.

³⁷ «Tsatsi ta mbanafata ghulpata mndu kay guli ná, laviŋ a ta pyafta Lazar ma ŋa kwal kul mtuta ra,» ka sanlaha mataba taŋ.

Vranamta Yesu ta hafu ma Lazar

³⁸ Ka læglagha tsi ta ɲudufa Yesu. Ka sli'aftá tsi ka lagha ta kulu. Sana galigha ya fun lu ta klam ta wani.

³⁹ «Taɲwalaghwa ya klam ta wani ya,» ka Yesu. «Mghama dá! Nda ghada zi'atani, kabga ma fwada fitikani na manda padamta,» ka Marta, muku-mani ma tsa mndu nda mta ya.

⁴⁰ «Mnagha a yu kazlay: Ka zlg hafzlg ha ka ná, dza'a nda nga ka ta mbrakwa Lazglafta kə'a kay ra?» ka Yesu nda tsi.

⁴¹ Ka taɲwalaghutá həŋ ta tsa klam ya. Ka ng-hadaftá Yesu nda ta luwa, ka'a mantša: «Da! Ta rfay yu ta kagha, kabga ta zlg hafzlg ha ka ta tawa dá.

⁴² Nda sna yu kazlay: Ta gɔagɔa ka ta zlg hidiftawa dá kə'a. Nziya nza tsi ná, ɲa na mnduha ta widifta na ta mna yu, kada zlg hafta həŋ,» ka'a.

⁴³ Tahula mnatani ta tsa gwaɔa ya, ka'a nda lwi dagaladagala mantša: «Lazar! Sabsa,» ka'a.

⁴⁴ Ka sabə tsa Lazar si nda mta ya nda slah-watá səlahani nda dzvuhani, nda patak ma kuma. «Paliɲwapala, ka mbaɔa tsi ta mbaɔa,» ka Yesu nda həŋ.

Baray mghamha ta vgha ɲa dzatá Yesu

Mat 26:1-5, Mak 14:1-2, Luk 22:1-2

⁴⁵ Mataba tsa la Yahuda si ta lagha da zgwa Mari ya ná, nda ndəgha sanlaha ta zlg haftá Yesu ng haŋər həŋ ta skwi maga tsi.

⁴⁶ Ka sli'aftá sanlaha mataba taɲ, ka laghwi slanaghatá la Farisa, ka rusanaftá skwi maga Yesu ta həŋ.

⁴⁷ Lagha la mali ta ghəŋa gwal dra skwi ŋa Lazglafta nda la Farisa, ka tskanatá gwal tsa guma. Ka həŋ mantsa: «Dagala mazəməzəm ta magə tsa mndu ya, waka mu dza'a magay na?»

⁴⁸ Ka zlanazla mu ka va magayni katsi ná, dza'a sli'aghuslia mnduha da zlgħaftá tsatsi, ŋa sagha la Ruma da zadanatá həga Lazglafta nda mndəra amu tani,» ka həŋ.

⁴⁹ Ka Kayifa ta nzakway tekw mataba la mali ta ghəŋa la Yahuda, ya zbap lu ka mali ta ghəŋa gwal dra skwi ŋa Lazglafta ma tsa vaku ya, nda həŋ mantsa: «Kaghuni wa, had skwi snaŋ kuni wa.

⁵⁰ Had kuni ta ndanu ra? Draŋ mtuta mndu turtuk da manaka mnduha, kaya dza'a zadanata lu ta mndəra mndu nekwnekw,» ka'a.

⁵¹ Tsaw tsa gwađa mnə tsi ya ná, nda đvayni a wa. Ma vəl tsa nzakwani ka mali ta ghəŋa gwal dra skwi ŋa Lazglafta ya ná, ka mnutá tsi kazlay: Dza'a mtumta Yesu da mnaka la Yahuda kə'a.

⁵² Ŋa la Yahuda nda ghəŋa taŋ a wu, nda nza guli ŋa tskanatá inda zwana Lazglafta ta widatá vgha.

⁵³ Daga bađu tsa ka dzraftá həŋ ta wi ŋa dzata Yesu.

⁵⁴ Tsaya kwal Yesu margəltá vghani baŋluwa mataba la Yahuda. Ka sli'aftá tsi ka laghwi da sana luwa ta hgə lu ka Ifrayim ndusa nda wa mtak. Ka nzatá tsi hada kawadaga nda duhwalhani.

⁵⁵ Ka ndusaktá fitika skalay la Yahuda ta Pak. Ma kdaku tsa fitika skalu ya, ka sli'adagħatá ndəghata mnduha tsa hadik ya da luwa Ursalima, ŋa ghuβiŋtá vgha taŋ.

⁵⁶ «Ta ndanə kuni ná, dza'a sagħasa da vla skalu re, ari sagħata a wa na?» ka həŋ mataba taŋ, ka

zba Yesu.

⁵⁷ Tsaw si mnumna la mali ta ghəŋa gwal dra skwi ŋa Lazglafta nda la Farisa kazlay: Ka wa mndu da sŋaŋtá vli hada tsi ya ná, ka mna tsi ŋa ksafata, ka həŋ.

12

Pghafta Mari ta urdi ta səla Yesu

Mat 26:6-13, Mak 14:3-9

¹ Ta pďákwa fitik mku' ka maga skala Pak, ka Lagha Yesu da luwa Betani, ma tsa luwa ta nzaku Lazar, tsa mndu sli'aganap tsi ma mtaku ya kay.

² Ka danatá lu ta skwa zay hada, ka dgə Marta. Tekw tsa Lazar ya mataba tsa mnduha ta nzata ŋa za skwa zay kawadaga nda Yesu ya.

³ Ka klaftá Mari ta hwaraka urda sana fu ta hgə lu ka Nar, nda bla dzvani, ka rita litir. Ka pghə tsi ta səla Yesu, ka takaday nda swida ghəŋani. Ka vərtikanaftá tsa urdi ya ta vli ma inda tsa həga ya.

⁴ Ka Zudas Iskaryut zwaŋa Simuŋ, ta nzakway tekw mataba duhwalha Yesu ta dza'a skwapta ya mantsa:

⁵ «Had'lu si ta skwaptá na Urdi na ka tseda vagma mnduha hkən dərmək* ka daganafatá gwal ka pďu ra?» ka'a.

⁶ Vərdá gwadá ta la pďu a gwadə tsi wa. Vərdá tsatsi ná, ghali ya kabga ta dza'a tsatsi nda kla'atá tsa skwi ta tskə lu ma zlibi da tsi ya.

⁷ Ama ka Yesu mantsa: «Zlanazla! Ka fata tsi ŋa badu padá i'i.

⁸ Gwal pďu ná, tavata kaghuni hahəŋ. I'i, nzata a yu tavata kaghuni ŋa dekdek wu,» ka'a.

* **12:5** Ngha ta Yuhwana 6:7.

Mal dzatá Lazar; ka gwal dra skwi ŋa Lazglafta

⁹ Snaŋta ndəghata la Yahuda kazlay: Wa'a Yesu ma Betani kə'a, ka sli'adaghatá həŋ. Tsa sli'adaghata sli'adagha həŋ ya ná, ta ghəŋa gwada ta Yesu nda ghəŋani a wu, ta kumay həŋ ta nghanťá tsa Lazar sli'aganap Yesu mataba gwal nda rwa ya guli.

¹⁰ «Dzatá Lazar guli!» ka la mali ta ghəŋa gwal dra skwi ŋa Lazglafta kurata,

¹¹ kabga nda ndəgha la Yahuda ta sli'apta mataba taŋ ka laghwí da zlgħaftá Yesu ta ghəŋa gwada ta Lazar.

Lama Yesu da luwa Ursalima

Mat 21:1-11, Mak 11:1-11, Luk 19:28-40

¹² Gamahtsimani, ka snaŋťá dəmga ta sli'adaghata da tsa vla skalu ya kazlay: Wa'a Yesu ta sagha da Ursalima kə'a.

¹³ Ka ɓal həŋ ta sluhwa zlizlam ka dza'a da guyay ta tvi. Ka həŋ mantsa: «ŋa Lazglafta glaku! Ka tfanaghatfa Lazglafta ta wi ta mndu ta sagha nda hga Mgham. Ka tfanaghatfa Lazglafta ta wi ta Mghama la Isra'ila,» ka həŋ ka hla wi.

¹⁴ Manda ya nda vinda, ka mutsaftá Yesu ta zwaŋa kdih, ka laf tsi tida.

¹⁵ «Ma zləŋ kuni ta zləŋ mnduha ma luwa Ursalima,

wa'a Mghama ghuni ta sagha ta zwaŋa kdih[†],» ka'a.

¹⁶ Inda tsa skwiha ta magaku ya ná, ta sna a duhwalhani ta klatá ghəŋani karaku wa. Tahula kapanafta lu ta Yesu ma glakwani, ka havaktá həŋ

[†] 12:15 Ngha ta Zakari 9:9.

kazlay: Ta ghəŋa tsatsi vindafta lu ta tsa skwi ya kə'a, ka sagha tsa skwi mna lu ma gwaɗa Lazglafta ya magata manda va tsaya guli, ta ghəŋa Yesu.

¹⁷ Ka rusu inda tsa mnduha si kawadaga nda Yesu ya ta skwi nghan hən, ma fitika sli'aganaptani ta Lazar ma kulu, mataba gwal nda rwa ya.

¹⁸ Tsaya kəl mnduha ka sli'adaghata da guyay kabga snan̄ta tan̄ ta tsa mazəmzəm maga tsi ya.

¹⁹ «A had̄ sana skwi dza'a magata mu ya na! Ng-hawa ɓa ta inda mnduha ta dza'a mistani,» ka la Farisa mataba tan̄.

Maganatá slna ta Yesu, ka dza'a mistani

²⁰ Mamu la Grek‡ mataba tsa gwal ta sli'adaghata da Ursalima ŋa tsəlɓu da Lazglafta ma tsa fitika skalu ya.

²¹ Ka hən mant̄sa: «Mghama ɗa! Ta kumay ŋni ta guyata nda Yesu,» ka hən nda Filip ta nzakway ka mnda luwa Betsayda ta had̄ika Galili.

²² Ka laghu Filip mnanatá Andre, ka sli'aftá hən kawadaga ka laghwi mnanatá Yesu.

²³ Ka Yesu nda hən mant̄sa: «Nda maga fitik dza'a kəl lu ka kapanaftá Zwan̄a mndu ma glakwani.

²⁴ Kahwathwata ka yu ta mnaghunata, ndlen̄w manda va tsaya ta nzata hya nimaya ka dəɗam a tsi da had̄ik ka rwutani. Ka rwurwa tsi, dza'a yaf ya dagala.

²⁵ Mndu ta ɗva ghəŋani ná, dza'a zad̄ɪnzada. Ala, ka malaghumala ɗvafta tsa mndu ya ta Lazglafta ka skwiha ma ghəŋa had̄ik katsi, dza'a nzu-lanzula tsa mndu ya ta hafani ŋa kɗekedzen̄.

‡ 12:20 Ngha ta Yuhwana 7:35.

26 Kata kumay mndu ta magihatá slna ná, ka sawi tsi mista dá, ma tsa vli dza'a nzata i'i ya, hada dza'a nzata tsa mndu ta magihatá slna dá ya guli. Ka ta magihamaga mndu ta slna, dza'a nlanafnla Da dá ta tsa mndu ya,» ka'a nda hən.

Mnay Yesu ta gwada ta dza'ani mtaku

27 Ka Yesu mantsa: «Ndanana ná, wana nda tsa nɔdɔfa dá. Sna a yu ta skwi n̄a mnay dá wa. Da! Klapkla ta i'i ma na ghuya d̄an̄wa na ka yu, tsaw ta ghən̄a tsa ghuya d̄an̄wa ya klə yu ka saha ta ghən̄a hadik da ghuyay kay guli.

28 Da! Maran̄mara ta glakwa gha,» ka'a. «Ghadaghada yu ta maran̄tá glakwa dá, dza'a kday yu ta maray guli,» ka lwi gwadagata daga ta luwa.

29 «Luwa ya ta n̄əzlata,» ka d̄ənḡa ta snay. «Duh-walha Lazglaf̄ta ya ta gwadganata,» ka sanlaha.

30 Ama ka Yesu mantsa: «Tsa lwi ta gwadagata ya ná, ka n̄a dá a wa, ka n̄a ghuni gwadagata tsi.

31 Ndanana tama, nda maga fitika tsanaghatá guma ta na ghən̄a hadik na. Ndanana dza'a wud̄idin̄ta lu ta mghama na ghən̄a hadik na.

32 Ii, bad̄u kapad̄ifta§ lu ta na ghən̄a hadik ya, dza'a t̄fakt̄d̄ak yu ta inda mnduha da i'i,» ka'a.

33 Tvi kə'a dza'a mtaku ta mnə tsi ma tsa gwadani ya.

34 «Dza'a nzata n̄a k̄d̄ekedzen̄ Kristi, ka an̄ni taghafta ma deftera zlahu ná, waka kagha tama ta mnay kazlay: Dza'a kapanafkapa lu ta Zwan̄a mndu kə'a. Wa tsa Zwan̄a mndu ya?» ka tsa d̄ənḡa ya.

§ 12:32 Ngha ta Yuhwana 3:14.

³⁵ Ka Yesu mantsa: «Ta bats nzda tsuwadak karaku mataba ghuni. Tatake'a tsuwadak na na, Mbadawambada ta mba da ma tsuwadak, yaha vli da kuzaghunaghata. Mndu ta mba da ma grum na, sna a ta vli ta dza'a tsi wa.

³⁶ Zlghafwazlgha ta tsuwadak ta da kaghuni tsi na, kada nzakwa kuni ka zwana tsuwadak,» ka'a nda hən. Gwadata Yesu ta tsa gwada ya, ka laghu tsi ka zaghuta di'in nda hən, ka difaghuta.

Kwalaghuta la Yahuda ta zlghafta Yesu

³⁷ Kulam nda tsa mazəmzəmha mamaga tsi ta wa ira tan ya, ka kwalaghuta hən ta zlghafta.

³⁸ Mantsa ya dza'a kəl tsi ka nzakway ta6 ta gwada manda ya mna anabi Isaya kazlay:

«Mghama da, wa ta zlghafta gwada ya gwada ηni? Wa maranan Mgham Lazglafta ta mbrakwani*?»

³⁹ Skwi kwal hən zlghafta na, wya tsi ka Isaya mnata guli:

⁴⁰ «Lazglafta ta ghulpin ta ira tan,

ka tananafa ghəna tan,

na kwala tan nghan ta nda ira tan,

na kwala tan tsatsafta da mbədafta hən ta vgha tvə

i'i

na mbanafa da ta hən† kə'a,» ka Lazglafta.

⁴¹ Ma tsa fitika nghan ta Isaya ta glakwa Yesu ka mnə tsi ta gwada ta ghəjani‡ ya, mnata tsi ta tsa gwada ya.

⁴² Ma va tsaya na, mamu ndəghata la mali ta ghəna la Yahuda ta zlghafta Yesu. Ama ka kwalaghuta hən ta maran ta ghəna tan, kabga zləna gwada da

* **12:38** Ngha ta Isaya 53:1. † **12:40** Ngha ta Isaya 6:9-10.

‡ **12:41** Ngha ta Isaya 6:1.

la Farisa, da talinṭá lu ta hən ma həga tagha skwa taŋ.

⁴³ Malaghumala dṽafta taŋ ta ghubu da mnduha ka ya da Lazglafta.

Yesu ná, tsuwadakya

⁴⁴ Ka Yesu klanṭá lwi mantsa: «Mndu ta zlgħaftá i'i, i'i a zlgħaf tsi wu, tsa mndu ta ghunigihata ya zlgħaf tsi.

⁴⁵ Mndu nda ngha ta i'i, nda ngha ta mndu ta ghunigihata.

⁴⁶ I'i ná, tsuwadək yu, ka saha yu ta ghəŋa hadik kada kwala mndu ta zlgħaftá i'i da nzata ma grum.

⁴⁷ Ka nda sna mndu ta gwada mna yu, ka kwalagħutá tsi ta maga slna nda tsi katsi, i'i a dza'a tsa guma ta ghəŋani wu, kabga sa a yu ta ghəŋa hadik ŋa tsa guma wu, sasa yu ŋa mba mnduha ta ghəŋa hadik.

⁴⁸ Mndu ta vziḍta ka kwalagħutá tsi ta zlgħaftá gwada ḍa, dza'a tsanagħatsa lu ta guma. Tsa gwadaha gwada yu ya dza'a tsanagħatá guma baḍu kḍakwa ghəŋa hadik.

⁴⁹ I'i ná, gaghəŋ gaghəŋa ḍa a ta gwada yu ta gwada wa. Tsa Da ta ghunigihata ya ta mnihatá gwada ŋa gwaday ḍa, nda ya ŋa ta taghay ḍa ŋa mnduha.

⁵⁰ Nda sna yu kazlay: Skwi ta mnə tsi ná, ta vlay ta hafu ŋa kḍekedzen kə'a. Inda skwiha ta mnə yu ná, manda va skwi mniha Da ḍa ta mna yu,» ka'a.

13

Mbazanata Yesu ta səla duhwalhani

¹ Ta kdavakta fitik lu, gamahtsimani dza'a skala lu ta skala Pak. Nda sna Yesu kazlay: Saghasa fitik dza'a kəl tsi ka zlanatá na ghəŋa hadik na, ka laghu da Da kə'a. Dvudva tsatsi ta gwal ta zlghafta ma na ghəŋa hadik na, had kdavakta dvutani ta həŋ wa.

² Ka zə Yesu ta skwa zay nda duhwalhani gahawu. Nziya nza tsi, ghadaghada halaway ta hbutá Zudas zwaŋa Simuŋ Iskaryut ŋa skwaptá Yesu.

³ Nda sna Yesu ka ghəŋani kazlay: Sa daga da Lazglafta yu, dza'a vru da Lazglafta yu kə'a. Nda sna guli kazlay: Fanamfa Lazglafta ta inda skwi ma dzvani kə'a.

⁴ Ka sli'avatá tsi ma tsa vla za skwi ya, ka sudatá tsi ta lgutani, ka klaftá tsi ta ira gwada ka hbivta misti.

⁵ Ka tamtá tsi ta imi ma glifiŋ, ka mbambazə tsi ta səla duhwalhani. Ka ta takad tsi nda tsa ira gwada hbiv tsi misti ya kay.

⁶ Ka lagha tsi ta Simuŋ Piyer. Ka Simuŋ Piyer mantsa: «Mghama dá! Kagha ná, ŋa mbaza səla dá!» ka'a nda tsi.

⁷ «Ta kda a snaŋta gha ta na skwi ta magə yu na karaku wu, dza'a nda sna ka dazlay,» ka Yesu nda tsi.

⁸ «Kadzenkadzen, had ka ta walaŋtá mbaza səla dá wu,» ka Piyer nda tsi. «Ka mbazagha a yu ta səla gha wu, had ima gha ma i'i wu,» ka Yesu nda tsi.

⁹ Ka'a mantsa: «Mghama dá! Səlahá dá kwenkwen a dza'a ka mbazihata tama wu, nda dzvuha dá nda ghəŋa dá tani,» ka Simuŋ Piyer nda tsi.

¹⁰ Ka Yesu mantsa: «Ka nda mbazambaza mndu, had ta zbəgəltá mbaza wa. Ba səlahá kwenkwen dza'a mbambazanaghuta tsi, kabga tsuwedaka

vghani. Tsuwedaka vgha ghuni, tsaw kaghuni demdem a wu,» ka Yesu nda tsi. ¹¹ Nda sna Yesu ta mndu dza'a skwapta, tsaya kəl tsi ka mnay kazlay: Kaghuni demdem a tsuwedaka wu kə'a ya.

¹² Tahula mbambazanatani ta səlahə taŋ, ka sudglavatá tsi ta lgutani, ka nzəgladatá ka zəgəltá skwi. Ka'a nda həŋ mantsa: «Nda sna kuni ta tsa skwi magə yu ŋa ghuni ya ra?

¹³ “Mndu ta tagha skwi” ŋaŋni ka, “mghama ŋni” ka, ka kuni ta hga i'i. Ta ŋa ghuni tsaya, manda va tsaya yu.

¹⁴ Ka si i'i ta nzakway ka mgham, mndu ta tagha skwi ŋa mndu, mbaza ghuna mbaza yu ta səla ya ní, kaghuni guli ŋa mbazay ghuni mantsa ta ŋa sani nda sani.

¹⁵ Maraghunatá tsaya maraghuna yu, ŋa magay kaghuni guli manda tsa magaghuna yu ya.

¹⁶ Kahwathwata ka yu ta mnaghunata, had kwalva ta malaghutá mghamani wu, had mnda ghunay guli ta malaghutá mndu ta ghunafta wa.

¹⁷ Ka nda sna kuni ta tsaya, dza'a rfu kuni kata magay kuni ta slna nda tsi.

¹⁸ Nda kaghuni demdem a ta gwada yu ta tsa gwada ya wu, nda sna yu ta gwal zabap yu. Tsa gwada nda vinda ma defteri ya ná, dina ka magatani mantsa. “Mndu ta zə ŋni ta skwa zay kawadaga nda tsi ta lidista.*”

¹⁹ Ka yu ta mnaghunata daga ndanana ma kdaku skwi ka slata. Mantsa tama ka slasla skwi ya, ŋa zlgħafta ghuni kazlay: “T'i ná, i'i ya” kə'a.

²⁰ Kahwathwata ka yu ta mnaghunata, ka tsu'aftsu'a mndu ta mndu dza'a ghunafta yu katsi

* **13:18** Ngha ta Zabura 41:10.

ná, i'i tsu'af tsi. Ka tsu'aftsu'a tsi ta i'i, tsu'aftsu'a guli ta mndu ta ghunigihata,» ka'a.

Sli'a Zudas skwaptá Yesu

Mat 26:20-25, Mak 14:17-21, Luk 22:21-23

²¹ Tahula kdínta Yesu ta mana tsa gwadaha ya, ka ghudzavaftá ndufani, ka'a mantsa: «Kahwathwata ka yu ta mnaghunata, mamu sani ma kaghuni dza'a skwaptá i'i,» ka'a mnanan̄ta hən̄ baz.

²² Ghurghurghur, ka duhwalhani ka nanagha vgha tan̄. Sew sna a hən̄ ka ta wa ta mna tsi wa.

²³ Tsaw sani turtuk mataba duhwalhani, tsa ta mamə Yesu ya, tavata Yesu nzanavata tsi.

²⁴ «Wa na mndu ta gwadə ka ta ghən̄ani na na? ka ka dawant̄a da tsi ba?» ka Simun̄ Piyer nda tsi nda dzvu.

²⁵ Mantsa ya tama, «Waya ní mghama da,» ka tsa duhwal ya fadaghatá ghən̄ da ghuva Yesu ka daway.

²⁶ Ka Yesu mantsa: «Tsa mndu dza'a ni'agafta yu ta ndurzla dafa ka vlan̄ta ya ná, vani tsaya,» ka'a nda tsi. Ka ni'agaftá tsi ta ndurzla dafa ka vlan̄tá Zudas zwan̄a Simun̄ Iskaryut.

²⁷ Na gi tsa zlghafta Zudas ta tsa ndurzla dafa ya, gi lama halaway dida tsa. «Maga misimmisim ta skwi ta kumə ka ta magay,» ka Yesu nda tsi.

²⁸ Haf mndu dər ka turtuk mataba tsa gwal ta nzata ka za skwi ya nda sna ka kabgawu kəl tsi ka mnay n̄ani mantsa wa.

²⁹ Zlah la skwaktá skwi n̄a za skalu, ka la valan̄tá skwi ta gwal ka pdu a ka Yesu nda tsi, ka sanlaha ta ndanay, kabga da Zudas zliba tska skwa tan̄.

³⁰ Na zlghafta Zudas ta tsa ndurzla dafa ya, ka gi sabə tsi dzibil. Rvidik vli ta tsa luwa ya.

Dvuwadva ta vgha ghuni

³¹ Tahula saghwa Zudas dzibil, ka Yesu mantsa: «Ndana na nlanaftha lu ta Zwanja mndu. Ka nlanaftha lu ta Lazglafta guli nda ma tsatsi.

³² Ka nda ma tsatsi zlagiginja Lazglafta ta glakwani ya, dza'a mariginjara ma varda tsatsi ta glakwa zwanj guli, dza'a gi magay ndana ndana.

³³ Zwana da, ta bats yeya nzda da kawadaga nda kaghuni, dza'a zbay kuni ta i'i. Manda va ya mnana yu ta la Yahuda kazlay: Lavinj a kuni ta bhata ma vli ta dza'a yu wu ka'a ya, manda tsaya ta mnaghunanta yu ta kaghuni guli ndana.

³⁴ Wana lfida zlahu ta vlaghunata yu. Dvuwadva ta vgha ghuni sani nda sani. Manda va ya dvu i'i ta kaghuni ya, dvuwadva kaghuni guli ta vgha ghuni sani nda sani.

³⁵ Ka ta dvudva kuni ta vgha ghuni sani nda sani katsi, ta tsaya dza'a snanta mnduha kazlay: Duhwalha da kuni ka'a,» ka'a.

Mnay Yesu ta krughuva Piyer

Mat 26:31-35, Mak 14:27-31, Luk 22:31-34

³⁶ Ka Piyer mantsa: «Mghama da! dza'a diga ka na?» ka'a nda tsi. «Lavinj a ka ta bhata da tsa vli ta dza'a yu ya ndanana wu, dazlay ya, dza'a bhabha ka mista da,» ka Yesu nda tsi.

³⁷ Ka Piyer mantsa: «Mghama da! kabgawu dza'a kwal yu lavintá bhata mista gha ndana na? Dər ɲa dzatá i'i tsi, fafa yu ta vgha da ka ɲa gha,» ka'a nda tsi.

³⁸ Ka Yesu mantsa: «Va kahwathwata, fafa ka ta vgha gha ɲa da ra? Kahwathwata ka yu ta mnaghata, ma kdaku vazak wahata ná, hkən səla

dza'a mnata ka kazlay: Sna a yu ta na mndu na wu, kə'a nda i'i,» ka'a.

14

Nda ma Yesu tva dza'a da Da

¹ Ka Yesu nda duhwalhani kay guli mantsa: «Yaha ɲudufa ghuni da tɔu, fafwafa ta ghəŋa ghuni ta Lazglafta faf kuni guli ta ghəŋa ghuni ta i'i.

² Nda ndəgha vla nzaku ma həga ga Da ɗa, ka má haɗ tsi mantsa wu, má mnaghunamna yu. Dza'a nda sli'a yu da payaghunata vli.

³ Tahula laghwa ɗa ka payaghunata vli, dza'a vragavra yu, ɲa hlay ɗa ta kaghuni tavata i'i. Na mutsafta kaghuni guli ta nzaku ma vli dza'a nzata i'i, ka'a.

⁴ Wya nda sna kaghuni ta vli ta dza'a yu, nda sna kuni ta tvi guli,» ka'a.

⁵ Ka Tuma mantsa: «Mghama ɗa, sna a ɲni ta vli ta dza'a ka wu, waka aɲni dza'a snaɲta tvi?» ka'a nda tsi.

⁶ Ka Yesu nda tsi mantsa: «I'i tvi, i'i kahwathwata, i'i hafu. Haɗ mndu dza'a laviɲta lami da həga ga Da, ka nza a tsi nda tvə i'i wa.

⁷ Ka nda sna kuni ta i'i dza'a nda sna kuni guli ta Da ɗa. Ndanana ná, nda sna kuni, nda ngha kaghuni guli,» ka'a nda tsi.

⁸ Ka Filip mantsa: «Mghama ɗa! Maraɲnamara ta tsa Da ya, ka zɗafta ɲudufa ɲni,» ka'a nda tsi.

⁹ Ka Yesu nda tsi mantsa: «Nda kɗa fitika ɗa kawadaga nda kaghuni Filip ná, ta sna a ka ta i'i ra? Ka nda ngha mndu ta i'i ná, nda ngha ta Da. Waka ka dza'a mnay kazlay: Maraɲnamara ta Da kə'a na?

¹⁰ Zlghaf a ka kazlay: Ta nzaku ma Da i'i, Da guli ta nzaku ma i'i kə'a ra? Nana gwadaha ta mnaghunata yu na ná, ma ghəŋa da a ta kla'ata yu wa. Tsa Da ta nzaku ma i'i ya ta maga tsa slnaha ya.

¹¹ Fafwa fa ta ghəŋa ghuni ta skwi ta mnaghunata yu kazlay: I'i ta nzaku ma Da, Da guli ta nzaku ma i'i kə'a ya. Fafwafa ta ghəŋa ghuni dər ta ghəŋa tsa slnaha yeya tsi.

¹² Kahwathwata ka yu ta mnaghunata, mndu ta zlghaftá i'i, dza'a magay tsatsi guli ta slna ta magə yu. Dza'a magay ka malaghuta kabga nda sli'a i'i da Da da.

¹³ Mantsa tama, inda skwi dza'a kuni dawanta nda hga da, dza'a magay yu, kada maranta Da ta glakwani nda ma zwan.

¹⁴ Ka dawandawa kuni ta sana skwi nda hga da, dza'a magay yu,» ka'a.

Dza'a ghunaga ghuna Da ta Sulkum nda ghu6a

¹⁵ «Ka dvudva kuni ta i'i, dza'a snasna kuni ta zlahuha da.

¹⁶ I'i, dza'a daway yu da Da ta sana mndu ŋa ghunəgaghunatani ŋa nzatani ŋa dekdek kawadaga nda kaghuni ŋa kata kaghuni.

¹⁷ Tsa mndu ya ná, Sulkuma kligintá kahwathwata ya. Lavinj a mndu ma ghəŋa hadik ta tsu'afwa wa. Lavinj a hən ta snanta guli wa. Kaghuni nda sna kaghuni, kabga ta gdata kawadaga nda kaghuni, dza'a gdavagda ŋa dekdek ma nudufa ghuni.

¹⁸ I'i, zlaghunata a yu manda zwana tawakri wu, dza'a vragaghavra yu da kaghuni.

19 Ta bats nzda da, nghanta a mnduha ma ghəŋa hadik ta i'i wa. Kaghuni ya, dza'a nda ngha kuni ta i'i, kabga ta nzaku nda hafu i'i, dza'a nzata nda hafu kaghuni guli.

20 Bađu tsaya dza'a snanta kuni kazlay: Ta nzaku ma Da i'i, ta nzaku ma i'i kaghuni, i'i guli ta nzaku ma kaghuni yu kə'a.

21 «Ka nanaŋa mndu ta zlahuha da ka snata, tsaya mndu ta dvutá i'i. Dza'a dvudva Da da ta tsa mndu ta dvutá i'i ya. I'i guli dza'a dvudva yu ŋa marananta da ta nzakwa da,» ka'a.

22 «Kinawu ka kagha dza'a maravata da anŋi, kul maravata ka da mnduha ta ghəŋa hadik na?» ka Zuda, Zudas Iskaryut ya a wa.

23 Ka Yesu nda tsi mantsa: «Ka dvudva mndu ta i'i, dza'a nanaŋa ta gwada da, dza'a dvudva Da da ta tsatsi guli. Na sagha ŋni nda Da da tani ŋa nzakwa ŋni ga tan.

24 Ka dvu a mndu ta i'i wu katsi, nana a ta gwada da wu, nana gwada ta mnaghunata yu ta snə kuni na ná, kla a ma ghəŋa da a yu wu, tsa Da da ta ghunighata ya ta mnihata.

25 «Mnaghunamna yu ta tsaya ta wana yu kawadaga nda kaghuni na.

26 Tsa mnda kata mndu dza'a saha ya, Sulkum nda ghuḅa ya dza'a ghunagata Da nda hga da. Tsatsi dza'a taghaghunaftá inda skwi, ŋa havaghunaktá inda gwada managhuna yu.

27 «Zdaku ya ta zlaghunanta yu* . Zdakwa da ya ta vlaghunata yu. Vla a yu ŋa ghuni manda ya ta vlə mnduha ma ghəŋa hadik wa. Yaha ŋudufa ghuni da tdu, yaha kuni da zləŋ.

* 14:27 Ngha ta Isaya 9:5.

²⁸ Nda sna kuni ta gwada mnaghuna yu kay, “nda sli’a yu, dza’a vragaghavra yu da kaghuni.” Ka ta dvay kuni ta i’i katsi ná, dza’a rfay kuni ta rfu ta ghəŋa má snaŋta ghuni kazlay: Nda sli’a yu da Da kə’a, kabga mal Da ka i’i.

²⁹ Wana yu ta mnaghunatá tsa skwiha ya ndanana ma kdaku həŋ ka slata, kada zlgħafta kuni ta skwi ta mnaghunata yu, slarə tsi.

³⁰ Had gwada ta dagala ta ŋa mnaghunata da wu, kabga wya tsa ghwadaka mghama na ghəŋa hadik na ya ta sagha. Tsaw laviŋ a ta ŋraptá i’i wa.

³¹ Dina ka snaŋta mnduha ta ghəŋa hadik kazlay: Dvudva yu ta Da kə’a. Inda skwiha ta magə yu guli ná, manda va ya mniha Da ta maga yu. Sli’afwasli’a hadna mbadma,» ka’a.

15

Yesu vərda fwa Inabi

¹ «I’i vərda fwa inabi, Da da mnda hvay. ² Inda dzva fu ta dzuslafta ta i’i, kul had ta yaku ná, ta tsinŋta. Inda dzva fu ta dzuslafta ta i’i ta yaku guli na, ta sladafslada ŋa sgəglavaghata yakwani.

³ Ghadaghada tsa gwada ta mnaghunata yu ya ta sladaftá kaghuni.

⁴ Gdavawagda nda ndi’atá vgha ta i’i manda ndi’atá i’i nda kaghuni ya. Laviŋ a dzva fu ta yafta ka ndi’a a tsi ta dughwan wa. Mantsa kaghuni guli, laviŋ a kuni ta magatá sana skwi ka gdava a ndi’atá kaghuni ta i’i wa.

⁵ I’i fwa inabi, kaghuni dzvuhani, mndu ta gdavata ndi’atani ta i’i manda i’i nda tsatsi ya,

dza'a yaf ya tsatsi rgədzəb. Ka hađ i'i wu, laviŋ a kuni ta magatá sana skwi wa.

⁶ Ka gđava a ndi'atá mndu ta i'i ná, dza'a wuđidiŋ wuda lu manda dzva fu ŋa ghwalutani, ŋa hlaftá tsa dzvuhani ya, ka pghamta ma vu, ŋa drutani.

⁷ Ka gđavagđa ndi'atá kaghuni ta i'i, ka gđavagđa gwada da guli ma kaghuni katsi, dawawadawa ta inda skwi ta kumə kuni, dza'a mutsay kuni.

⁸ Ka rgədzəb ta yafta kuni ta maray kuni ka-zlay: Duhwalhani aŋni kə'a, tsaya dza'a maraŋtá glakwa Da da.

⁹ Dvuđva i'i ta kaghuni manda va ya đvu Da da ta i'i ya. Gđavawagđa ma đvutá mnda da.

¹⁰ Ka ta snasna kuni ta zlaha da, dza'a gđavagđa kuni ma đvutá mnda da. Manda tsaya snata i'i ta zlaha Da da, kəl i'i ka gđavata ma đvutá mndani.

¹¹ «Mnaghunamna yu manda va tsaya kada yifafta rfa da ma kaghuni, ŋa ndəghafta rfa kaghuni guli.

¹² Wya zlaha da ta mnaghunata yu, đvuwadva ta vgha ghuni sani nda sani manda va ya đvu i'i ta kaghuni ya.

¹³ Hađ sana đvutá mndu ta malaghuta ta ghəŋa vlata mndu ta hafani ŋa grahani wa.

¹⁴ Ka ta magay kuni ta skwi ta mnaghunata yu ná, nda nza kuni ka graha da.

¹⁵ Hgəgla a yu ta kaghuni ka kwalvaha wu, kabga sna a kwalva ta skwi ta magə danahəgani wa. Graha da ta hga i'i ta kaghuni, kabga inda skwi taghaf yu da Da da ná, snaghunamsna yu.

¹⁶ Kaghuni a ta zbaptá i'i wu, i'i ta zabaptá kaghuni, ka faghunaghatá slna ŋa magay, ŋa yafta ghuni, ŋa gđavata tsa yakwa ghuni ya. Mantsa

tama, dza'a vlaghunavla Da da ta inda skwi dza'a kuni dawanta nda hga da.

¹⁷ Skwi ta mnaghunata yu na, ka dvuta kuni ta vgha ghuni sani nda sani,» ka'a.

Kwalaghuta ghəŋa hadik ta i Yesu nda duhwal-hani

¹⁸ Ka Yesu mantsa: «Ka ta husanhusa kuni ta mnduha ta na ghəŋa hadik na katsi, tinəl i'i ta husantá hən ka kaghuni.

¹⁹ Ka má ŋa na ghəŋa hadik na ka ghuni katsi, má dza'a dvafdva mnduha ta na ghəŋa hadik na ta kaghuni, kabga ŋa taŋ kuni mazlay. Zabapzaba yu ta kaghuni, ka hliginjá kaghuni mataba mnduha ta ghəŋa hadik. Ta ka ŋa mnduha ta ghəŋa hadik a kaghuni wu, kəl kuni ka husantá hən.

²⁰ Havakwahava ta gwada mnaghuna yu. "Malaghumala a kwalva ka Maləmani wa." Ka si ghuydipghuya mnduha ta danwa, dza'a ghuyay hən ŋa kaghuni guli. Ka si snasna hən ta gwada da, dza'a snay hən ta ŋa ghuni guli.

²¹ Ta gwada ta i'i dza'a maga hən ta tsaya ŋa ghuni, kabga sna a hən ta mndu ta ghunigihata wa.

²² Ka má sna a yu wu, ka má had gwada walaŋ yu ta mnanatá hən wu, má had dmakwa taŋ wa. Ndanana tama, lavgliŋ a hən ta mnay kazlay: Had dmakwa ŋni wu kə'a wa.

²³ Ka ta husanhusa yu ta mndu, ta husanhusa Da da ta tsa mndu ya guli.

²⁴ Ka má maga a yu mataba taŋ ta slnaha ya kul walaŋtá sani ma mndu ta magata wu katsi, má had dmakwa taŋ wa. Ndanana, nda ngha hən ta slnaha da, ka husantá yu ta hən nda Da da tani.

²⁵ Tsaw slasla tsaya mantša ya, ƚa nzakwa tsa gwada nda vinda ma deftera zlahatjan ta mnay kazlay: Ka bətbət husan̄ta* yu ta həŋ kə'a ya, manda va tsaya nzakwani.

²⁶ «Tsa mnda kata kaghuni dza'a saha ya, Sulkum ta kligin̄tá kahwathwata ya dza'a saha daga da Da. Dza'a mnay ta gwada ta i'i.

²⁷ Kaghuni guli, dza'a mnay kuni ta gwada ta i'i, kabga kawadaga kuni nda i'i, daga ka yawu zlrafta mu ta nzaku,» ka'a.

16

¹ Ka Yesu mantša: «Managhuna mana yu ta tsa skwiha ya, kada kwala kuni zlanavatá zlgħay nda ƚudufa ghuni.

² Dza'a talin̄tala lu ta kaghuni ma həga tagħa skwa la Yahuda. Tsaya ya a vani wu, ta sagħasa fitik dza'a kəl mnduha dza'a pslatá kaghuni ka ndanay kazlay: Na skwi maga mu na ná, magamaga mu ta skwi ta zdəganatá Lazgħafta kə'a.

³ Mantša ya dza'a maga həŋ, kabga sna a həŋ ta dər Da, dər i'i wu,» ka'a.

Dza'a sasa Sulkum nda għuḅa

⁴ Ka'a guli mantša: «Ka sagħasa tsa fitik ya, dza'a havakhava kuni ta skwiha managhuna yu. Tsaya kəl yu ka managhunatá tsahaya. Ta kawadaga yu nda kaghuni kwal yu ka mnaghunata daga tan̄tan̄.

⁵ Ndanana dza'a da mndu ta ghunigiha yu. Sew had̄ ya mataba ghuni ta d̄away kazlay: Dza'a da wa ka na kə'a wa.

* 15:25 Ngha ta Zabura 35:19, 69:5.

⁶ Ama ma mnaghunanṭa ḏa, ka gurdutá ṇudufa ghuni.

⁷ Kahwathwata na skwi ta mnaghunata yu na. Mal ma na laghwi dza'a laghu yu na kata ta kaghuni. Ka laghu a yu wu, sata a tsa mndu dza'a kata kaghuni ya da kaghuni wa. Ka laghula yu, dza'a ghunəgaghuna ghuna yu.

⁸ Ka sasa tsi, dza'a mnanamna ta mnduha ta ghəṇa hadik ta krughuva taṇ ta ghəṇa skwi ka dmaku nda ya ta ghəṇa skwi tdukwa, nda ya ta ghəṇa skwi ka guma.

⁹ Ta nanay mnduha ta ghəṇa hadik ta ghəṇa taṇ ta ghəṇa skwi ka dmaku, kabga kwala taṇ kul zghaftá i'i.

¹⁰ Ta nanay mnduha ta ghəṇa hadik ta ghəṇa taṇ ta ghəṇa skwi tdukwa, kabga nda sli'a i'i da Da, nghəglanṭa a kuni ta i'i wa.

¹¹ Ta nanay mnduha ta ghəṇa hadik ta ghəṇa taṇ ta ghəṇa skwi ka guma, kabga nda ghada tsanaghatá guma ta ghwadaka mghama na ghəṇa hadik na.

¹² «Ta dagala skwi má ṇa managhunata ḏa, tsaw laviṇṭa a kuni ta ṇafta ndana wa.

¹³ Ka sasa tsa Sulkum ta mniginṭá kahwathwata ya, dza'a snaghunamsna ta inda kahwathwata. Gwada ma ghəṇani a dza'a kla'ata tsi ka mnay wa. Inda skwi dza'a snanṭa tsi, dza'a tsi mnay, ṇa mnaghunatani ta skwi dza'a slaku ta kəma.

¹⁴ Tsatsi dza'a maranṭá glakwa ḏa, kabga skwi da i'i dza'a tsu'afṭa tsi ṇa mnay ṇa ghuni.

¹⁵ Inda skwa Da ḏa ná, ṇa ḏa ya. Tsaya kəl yu ka mnaghunata kazlay: Skwi da i'i dza'a klafta tsi ṇa mnay ṇa ghuni kə'a ya,» ka'a.

Dza'a mbədavafmbəda taw ka ghubasu

¹⁶ Ka'a guli mantsa: «Ta βets nzda, nghəglan̄ta a kuni ta i'i wa. Bats nzda guli, dza'a nghəglan̄ngha kuni ta i'i [kabga nda sli'a yu da Da,]» ka'a.

¹⁷ Ka sanlaha ma duhwalhani mataba hahəŋ hahəŋ mantsa: «“Ta βets nzda nghəglan̄ta a kuni ta i'i wu, βats nzda guli ná, dza'a nghəglan̄ngha kuni i'i guli. Nda sli'a yu da Da,” ka'a ná, gwada wu tsa gwada ya ta gwadamata tsi na?»

¹⁸ «“Ta βets nzda” ka'a ya ní, nu ghəŋ tsaya ma gwada tama? Sana a amu ta skwi ta kumə tsi ta mnay wu,» ka həŋ.

¹⁹ Daslafta Yesu ta skwi ta kumə həŋ ta daway da tsi, ka'a nda həŋ mantsa: «Ta dadawavustá kuni mataba ghuni ta ghəŋa skwi mnə yu kazlay: Ta βets nzda nghan̄ta a kuni ta i'i wu, βats nzda guli, dza'a nghəglan̄ ngha kuni ta i'i kə'a ya ra?»

²⁰ Kahwathwata ka yu ta mnaghunata, dza'a taway kuni ta taw, dza'a ŋaday kuni ta ghəŋ, ta rfu mnduha ta ghəŋa hadik ta rfu. Dza'a gurdaku ŋudufa ghuni, ŋa nutá tsa gurdátá ŋudufa ghuni ya ka rfu.

²¹ Ka saghasa fitika dgakwa marakw ná, ta ghuyay ta dan̄wa ta basay. Na gi yatani ta tsa zwan̄ ya, gi zanaptani ta tsa ghuya dan̄wani ya. Ta rfay ta rfu katakata, kabga nghan̄tani ta mnda səla ta saha ta ghəŋa hadik.

²² Mantsa ya ta basa kaghuni ndanana guli. Tsaw ta dza'a guyaku amu, ŋa rfay ghuni ta rfu. Had mndu dza'a lavin̄tá klaghutá tsa rfu ya da kaghuni wa.

²³ «Ka saghasa tsa fitik ya, had kaghuni dza'a dawanta skwi nda dawada i'i wa. Kahwathwata

ka yu ta mnaghunata, dza'a vlaghunavla Da ta inda skwi. Dza'a kuni dawanta nda hga da.

²⁴ Kulam gwatna had sana skwi ta kdə dawanta kuni nda hga da wa. Dawawadawa dza'a mutsay kuni, kada ndəghafta ɲudufa ghuni da rfu,» ka'a.

Ghubasapta Yesu ta ghəɲa hadik

²⁵ Ka'a guli mantsa: «Ka mahdihdi mnaghunata yu ta tsa gwada ya. Dza'a saghasa fitik dza'a kwal yu mnəgelta mantsa ɲa ghuni, ɲa mnaghunanta da ta skwi tsidid ta ghəɲa Da.

²⁶ Ma tsa fitik ya, kaghuni ka ghəɲa ghuni dza'a dawa skwi da Da nda hga da, dər maga a i'i ta du'a da tsi ɲa ghuni.

²⁷ Vərda Da kaghəɲani ná, ta dvay ta kaghuni kabga ta dvay kaghuni ta i'i. Grafgra kaghuni guli kazlay: I'i ná, sa daga da Lazglafta yu kə'a.

²⁸ Sli'af daga da Da i'i ka saha ta ghəɲa hadik. Ndanana guli, wana yu ta sli'af ta ghəɲa hadik ka vru da Da,» ka'a.

²⁹ Ka duhwalhani mantsa: «Had mahdihdi ma na tama wa. Wya zlra ka ta kligintá ghəɲa gwada.

³⁰ Ndanana tama, nda sna ɲni kazlay: Nda sna ka ta inda skwi kə'a. Ma kdaku mndu ka dawantá skwi da kagha, nda sna kagha ta skwi ta kumə tsi ta daway. Tsaya kəl aɲni ka zlghafta kazlay: Sa daga da Lazglafta kagha kə'a,» ka həɲ nda tsi.

³¹ Ka Yesu nda həɲ mantsa: «Ndanana zlra kaghuni ta zlghafta ba?

³² Wya fitik ta sagha, nda ghada va saghani katək ɲa wutsata ghuni ta vgha, ta ksə ya ta tvani ta ksə ya ta tvani, ɲa zlidivata ghuni turtukwa

da. Tsaw kahwathwata ná, turtukwa da a yu wu, kabga kawadaga nni nda Da.

³³ Managhunamana yu ta inda tsaha ya, kabga na mutsafta ghuni ta zdaku ma nzakwa guyata vgha ghuni nda i'i. Dza'a ghuyay mnduha ta ghəna hadik ta danwa na ghuni. Ka nzata kuni drusa. I'i, ghuḅasapghuḅasa yu ta mbrakwa na ghəna hadik na,» ka'a.

17

Ndabay Yesu ta dzvu ta ghəna duhwalhani

¹ Tahula gwadata Yesu ta tsa gwadaha ya, ka nghadaftá tsi nda ta luwa. Ka'a mantsa: «Da, nda maga fitik! Maranmara ta glakwa zwanə gha na maranta zwanə gha guli ta glakwa gha.

² Vlanvla ka ta mbraku ta ghəna inda mnda səla, na vlantani ta hafu na kdekeden ta gwal pgham ka ta hən ma dzvani.

³ Hafu na kdekeden ná, tsaya snanta tan ta kagha. Kagha vərda Lazglafu turtuktuk, nda snanta tan ta mndu ya ghunaga ka ta nzakway ka Yesu Kristi.

⁴ Maranmara yu ta glakwa gha ta ghəna hadik, kdinkda yu ta magatá slna ya vliha ka na magay.

⁵ Ndanana tama Da ná, nliɖif nla da kagha manda nzatá nzakwa da si ta kul zraftá ghəna hadik ya.

⁶ Snamnsa yu ta hga gha ta gwal hliɖin ka ma ghəna hadik ka vlihata ya. Si ka na gha hən, ka hlaftá ka ta hən ka vlihata. Ka snatá hən ta gwada gha.

⁷ Ndanana ná, nda sna hən kazlay: Inda skwi ya vliha ka ná, sagha da kagha kə'a.

⁸ Mnanamna yu ta hən̄ ta gwad̄a ya mniha ka, tsu'aftsu'a hən̄. Nda sna hən̄ dar kazlay: Daga da kagha sagha yu kə'a, zlg hafzlg ha hən̄ guli kazlay: Kagha ta ghunigihata kə'a.

⁹ «Ta ghəŋa hahən̄ ta maga yu ta du'a, maga a yu ta du'a ta ghəŋa pɔakwa mnduha ma ghəŋa hadik wa. Ta ghəŋa hahən̄ ta maga yu ta du'a, kabga ŋa gha hən̄.

¹⁰ Inda tsaha ta nzakway ka ŋad̄a ya ná, ŋa gha hən̄. Inda tsaha ta nzakway ka ŋa gha ya guli ná, ŋa d̄a hən̄. Ta maravamara glakwa d̄a ma hən̄.

¹¹ «Ta had̄ i'i ma ghəŋa hadik wa. Hahən̄ ná, tata ghəŋa hadik hən̄. Ta dza'a da kagha i'i. Da d̄a, kagha ta nzakway nda ghuɔa, ŋanaŋa ta hən̄ nda mbrakwa gha. Nda mndərga tsa mbraku vliha ka ya, kada nzakwa hən̄ ka mndu turtuk manda nzakwa u ka mnda turtuk ya.

¹² Ma tsa nzakwa d̄a kawadaga nda hən̄ ma ghəŋa hadik ya ná, si ta nghay yu ta hən̄ nda mbrakwa gha ya vliha ka. Ŋanaŋa yu ta hən̄, had̄ ya ta zadavaghuta wu, ba ya ta nzakway nda fa ŋa zwaduta, ŋa kd̄iŋtá skwi ya nda vinda ma defteri yeya ta zadapta.

¹³ Ndanana dza'a da kagha yu. Manda tsaya ta mna yu ma na nzakwa d̄a tata ghəŋa hadik na, kada ndəghafta rfa d̄a ma hən̄.

¹⁴ Mnanamna yu ta gwad̄a gha ta hən̄. Tsaya kəl hən̄ ka husaŋtá mnduha ma ghəŋa hadik, manda nzakwa i'i kul had̄ ka ŋa ghəŋa hadik ya.

¹⁵ Ndəɔa a yu ta dzvu da kagha ŋa hlaptá hən̄ ma ghəŋa hadik wa. Ama nghay yeya dza'a ka ngha hən̄ da katkata tsa ghwadak ya.

¹⁶ Manda nzakwa i'i kul had ka ŋa ghəŋa hadik ya ná, manda tsaya nzatá nzakwa hahəŋ, nza a həŋ ka ŋa ghəŋa hadik wa.

¹⁷ Niŋna ta həŋ ka ŋa gha, nda ma kahwathwata. Gwada gha ná, kahwathwata nzakwani.

¹⁸ Manda ya ghunaga kagha ta i'i ta ghəŋa hadik ya, i'i guli, ta ghunay yu ta hahəŋ ta ghəŋa hadik.

¹⁹ I'i faghafa yu ta ghəŋa da ka ŋa taŋ, kada nzakwa hahəŋ guli ka ŋa gha kahwathwata.

²⁰ «Ta ghəŋa na hahəŋ na yeya a ta maga yu ta du'a wu, ta magay yu ta du'a guli ta ghəŋa gwal dza'a zlghafta i'i nda ma gwada taŋ,

²¹ kada nzakwa həŋ demdem ka mnda turtuk. Da! Ka nza həŋ ka yakwa u manda guyatá u, kagha ma i'i, i'i ma kagha ya. Ka nza həŋ ka mnda turtuk ŋa mnay mnduha ma ghəŋa hadik kazlay: Kagha ta ghunigihata kə'a.

²² «I'i, ŋlanafŋla yu ta həŋ, manda tsa ŋlidifta kagha ya, kada nzakwa həŋ ka mndu turtuk, manda nzakwa u ka mndu turtuk,

²³ i'i ma hahəŋ, kagha ma i'i ya. Manda tsaya dza'a kəl həŋ ka nzakway kahwathwata ka mndu turtuk, kada sənəta mnduha ma ghəŋa hadik kazlay: Kagha ta ghunigihata, dɔvudɔva kagha ta həŋ manda ya dɔv u kagha ta i'i guli ya kə'a.

²⁴ Da! Tsəna mnduha vliha ka na ná, ta kumay yu ta nzakwa taŋ ma vli ya nza i'i, ŋa nghay taŋ ta glakwa da ya vliha kagha, kabga dɔvudɔva ka ta i'i daga ta kul zlraftá ghəŋa hadik.

²⁵ Da da! Tudukwa nzakwa kagha, tsaw sna a mnduha ma ghəŋa hadik ta kagha wa. I'i, nda sna yu ta kagha, na hana guli, tsatsaftsatsa həŋ kazlay: Kagha ta ghunigihata kə'a.

26 Snanamsna yu ta kagha ta hən, ta dza'a snəglanamsna yu ta hən, kada nzamta tsa dʋu dʋaf ka ta i'i ya ma hən, ɲa nzamta i'i ma hən guli,» ka'a.

18

Ksafta sludziha ta Yesu

Mat 26:47-56, Mak 14:43-50, Luk 22:47-53

¹ Tahula kdɪŋta Yesu ta tsa gwadaha ya, ka sli'aftá tsi nda duhwalhani ka laghwi ta 6la lika Sedruŋ. Mamu sana kwambalu mantsa vli ya, ka lamə tsi dida kawadaga nda hən.

² Nda sna tsa Zudas ta dza'a skwapta ya guli ta tsa vli ya, kabga snusna Yesu ta lagha da tsa vli ya kawadaga nda hən.

³ Ka hlanaftá la mali ta ghəŋa gwal dra skwi ɲa Lazglafta, nda la Farisa ta sludziha, nda gwal ta ngha həga Lazglafta, ta Zudas. Ka sli'aftá hən nda huzla vulu nda huzla vulu, nda pelapela nda pelapela, nda pinatá vu nda pinatá vu. Ka lagha hən da tsa gam ya.

⁴ Manda ya nda sna Yesu ta skwi dza'a slanaghata, ka sli'aftá tsi da gəma hən. Ka'a mantsa: «Wa ta zbə kuni na?» ka'a nda hən.

⁵ Ka hən mantsa: «Yesu mnda la Nazaret ya ta zbə ɲni,» ka hən nda tsi. «I'i nana,» ka'a nda hən. Ta sladu tsa Zudas ta dza'a skwapta ya kay tavata hən.

⁶ Na tsa mnay Yesu nda hən kazlay: I'i nana kə'a ya, dəm turtuk ka hən vraghuta nda ga muhul hul, ka zlambutá hən siy ta hadik.

⁷ «Wa ta zbə kuni ka kuni ka na?» ka'a dawglan̄ta da hən̄. «Yesu mnda la Nazaret ya ta zbə ηni,» ka hən̄.

⁸ «Vada nana a ka yu nda kaghuni kay ra! Ka si i'i ta zbə kuni ya ni, zlanawa nanaha na tsa, ka laghwa hahən̄,» ka Yesu nda hən̄.

⁹ Kəl tsi ka mnay mant̄sa ya ná, ηa nzakwani manda va tsa gwada mnə tsi kazlay: Had̄ ya dər turtuk zad̄anaghu yu mataba gwal ya vliha ka wu kə'a ya, ya.

¹⁰ Mamu kafay da Simuη Piyeṛ, ka tsəhagaptá tsi ka tsanamtá sani ma kwalva mali ta ghəηa gwal dra skwi ηa Lazglafta, ka tsaghutá sləmən̄jani nda ga zeghwi. Malkus hga tsa kwalva ya.

¹¹ Ka Yesu mant̄sa: «Vranamvra ta kafaya gha da kupakani. Ra a ka say da ta leghwa ghuya dan̄wa ya vliha Da da wu ka ka rki na?» ka'a nda Piyeṛ.

Kladaghata la sludzi ta Yesu da Hana

¹² Lagha tsa tskatá sludziha ya nda mghamha tan̄ tani, nda la Yahuda ta ngha həga Lazglafta ya, ka ksaf̄tá Yesu, ka habaghutá hən̄ ta dzvuhani.

¹³ Ka klaghatá karaku da Hana ta nzakway ka dzidza Kayifa. Tsa Kayifa ya ta nzakway ka mali ta ghəηa gwal dra skwi ηa Lazglafta ma tsa vaku ya.

¹⁴ Tsa Kayifa ya tsa ta vlan̄tá hid̄aku ta la Yahuda kazlay: Draη mtuta mndu turtuk da mnaka mn-duha, ka ya da zad̄anata lu ta inda mndəra mndu* kə'a ya kay.

* **18:14** Ngha ta Yuhwana 11:49.

Duhwala Yesu a yu wu, ka Piyer

Mat 26:69-70, Mak 14:66-68, Luk 22:55-57

¹⁵ Ka sli'aftá i Piyer nda sna duhwal, ka dza'a ta hula Yesu ta hula Yesu. Tsa sana duhwal ya ná, nda sna tsa mali ta ghəŋa gwal dra skwi ŋa Lazglafta ya. Ka lamə tsi mista Yesu da daʒi ma huɗa həga ga tsa mali ta ghəŋa gwal dra skwi ŋa Lazglafta ya,

¹⁶ ta sladaghutá Piyer ma bli ta watgha. Ka vragaptá va tsa duhwal snəŋ mali ta ghəŋa gwal dra skwi ŋa Lazglafta ya, da gwadganatá tsa marakw ta ngha watgha ya. Ka hɗadamtá tsi ta Piyer.

¹⁷ Ka'a nda tsi mantsa: «Tekw a kagha mataba duhwalha tsəna mndu na guli wu ri?» ka tsa marakw ka kwalva ta ngha watgha ya nda Piyer. «Tekw a i'i mataba taŋ wu,» ka Piyer.

¹⁸ Ka vanaghatá kwalvaha nda gwal ta ngha həga Lazglafta ta vu, ka slinə həŋ, kabga mtasl vli. Ka lagha Piyer guli da slinganatá həŋ.

Daway Hana ta gwada da Yesu

Mat 26:59-66, Mak 14:55-64, Luk 22:66-71

¹⁹ Ka'a nda tsi mantsa: «I wa duhwalha gha na? Nahgani ta taghə ka ŋa mnduha na?» ka tsa mali ta ghəŋa gwal dra skwi ŋa Lazglafta ya, nda Yesu.

²⁰ Ka Yesu nda tsi mantsa: «Baŋluwa si ta mna yu ta gwada ŋa inda mndu ma həga tagha skwa la Yahuda nda ya ma həga Lazglafta. Ma vli ta tskavata inda la Yahuda si ta gɗata yu ta tagha skwiha. Haɗ sana skwi mna yu kɗekkɗek wa.

²¹ Kabgawu ta kəl kagha ka daway da i'i na? Dawa da gwal si ta sna tsa skwi ta mnə yu ŋa taŋ

ya 6a. Nda sna hahəŋ dīnadīna ta skwi mnana yu ta həŋ,» ka'a nda tsi.

²² Na tsa mnata Yesu mantsa ya, ka sli'aftá sani mataba tsa gwal ta ngha həga Lazglafta ya, ka lagha dgharunťá Yesu. «Mantsa ta zlgħa ka ta wi ŋa mali ta ghəŋa gwal dra skwi ŋa Lazglafta ra?» ka'a nda tsi.

²³ Ka Yesu mantsa: «Ka mamu ghwadaka skwi mna yu ya kay, mnaməŋmna. Ala ka si tđukwa gwada mna yu, kabgawu ta kəl lu ka dza i'i na?» ka'a nda tsi.

²⁴ Ka ghunaftá Hana nda va tsa habatá dzvuhani ya da tsa Kayifa ta nzakway ka mali ta ghəŋa gwal dra skwi ŋa Lazglafta ya.

*Duhwala Yesu a yu wu, ka Piyer kay guli
Mat 26:71-75, Mak 14:69-72, Luk 22:58-62*

²⁵ Ma tsa fitik ya, hada Simuŋ Piyer ta slinutá vwani. «Tekw a kagha mataba duhwalha tsəna mndu na guli wu ri?» ka lu nda tsi. «Siga! had i'i mataba taŋ wu,» ka Piyer ka wadutá vli.

²⁶ «Ngha a yu ta kagha kawadaga nda tsəna mndu na ma gam ra?» ka sani mataba kwalvaha tsa mali ta ghəŋa gwal dra skwi ŋa Lazglafta ya. Tsatsi ná, la taŋ ma tsa mndu tsanaghu Piyer ta sləməŋani ya, ya.

²⁷ «Siga yu, i'i a wu!» ka Piyer ka wadutá vli kay guli. Ka gi wahatá vazak.

*Daway Pilat ta gwada da Yesu
Mat 27:1-2,11-14, Mak 15:1-5, Luk 23:1-5*

²⁸ Gasərdək, ka klaftá həŋ ta Yesu ga Kayifa, ka klaghata da həga dagala ga ŋumna la Ruma. Lamə

a vərđa hahəŋ da tsa həga ya wu, da ŋrɪŋtá həŋ ta vgha taŋ makəf həŋ ka za skala Pak.

²⁹ Tsaya kəl Pilat ŋumna la Ruma ka sabi dzibil da slanaghatá həŋ. Ka'a nda həŋ mantsa: «Nu va ghwadaka skwi maga na mndu na ka kuni ka na?» ka'a.

³⁰ Ka həŋ mantsa: «Ka má nza a tsi ka mndu ta magatá dmaku wu katsi ná, má klaghak a ŋni wu,» ka həŋ nda tsi.

³¹ «Klawakla va kaghuni, ka dza'a kuni da tsanaghatá guma manda ya mna zlahá ghuni,» ka Pilat nda həŋ ta ghəŋani. «Vlaŋna a lu ta tva dzatá mndu wu,» ka la Yahuda zlghanaftawani.

³² Mantsa ya dza'a magakwa skwiha na ya gwadə Yesu ta ghəŋani kə'a dza'a mtaku ya.

³³ Ka vraghatá Pilat da daḅa həga, ka hgadamtá tsi ta Yesu. «Mghama la Yahuda kagha ra?» ka'a dawanta da tsi.

³⁴ Ka Yesu mantsa: «Kagha ta ndanapta ma ghəŋa gha re, ari sanlaha a ta mnaghatá i'i na?» ka'a nda tsi.

³⁵ «I'i! La Yahuda yu ra? Laghuni, nda maliha ta ghəŋa gwal dra skwi ŋa Lazglafta ta klaktá kagha da i'i, nahgani maga ka ya katək na?» ka Pilat nda tsi.

³⁶ Ka Yesu mantsa: «Ga mghama da ná, ŋa na ghəŋa hadik na a wa. Ka má ŋa na ghəŋa hadik na tsi katsi, má lmalma kwalvaha da, má ŋa kwala lu klagaghatá i'i da gwal dagaladagala mataba la Yahuda. Tsaw ŋa na ghəŋa hadik na a ga mghama da wu,» ka Yesu.

³⁷ «Tsaw va mgham kagha rke?» ka Pilat nda tsi. «Manda va tsa mna ka ya, Mgham yu. Yaya lu ta i'i

ɲa sagha mnanɲá kahwathwata ma na ghəɲa hadík na. Inda mndu ta nzakway ka ɲa kahwathwata ná, ta snay ta gwada da,» ka Yesu.

³⁸ «Nahgani kahwathwata na?» ka Pilat nda tsi.

Guma dzatá Yesu

Mat 27:15-31, Mak 15:6-20, Luk 23:13-25

Tahula tsa, ka səglap tsi dzibil slanaghatá la Yahuda. Ka'a mantsa: «Slanagha a yu ta skwi præk ɲa dzatá tsəna mndu na wa.

³⁹ Ya wya ta snusna yu ta gɟata ta zlighunistá mndu turtuk ma gamak ma fitika skala Pak ya, ta kumay kuni ta slighunista da ta mghama la Yahuda ra?» ka'a nda həɲ.

⁴⁰ Ka həɲ mantsa: «Tsatsi a ɲa zliɲta wa, Barabas katsi,» ka həɲ hləgləftawi. Tsaw tsa Barabas ya ná, gənda ya.

19

¹ Tahula tsa, klagaghawa tsa Yesu ya ka sləvapta kuni nda krupi, ka Pilat.

² Lagha la sludzi ka daftá teki, ka fanamta ma ghəɲ manda zewzewa, ka sudanavatá həɲ ta lguta má mgham mgham ka dva guli.

³ «Zgutsa ɲa gha mghama la Yahuda,» ka həɲ gavadaghata tavatani, ka dadgharay.

⁴ «Ndana tama wana yu dza'a kləgaghunapta dzibil, kada grafta kuni kazlay: Slanagha a yu ta sana skwi præk ka dzatá na mndu na wu kə'a,» ka Pilat səglap dzibil slanaghatá la Yahuda.

⁵ Ka sabə Yesu nda zewzewa teki ma ghəɲ, nda sudatá lguta má mgham mgham ta vgha. «Wana tsa mndu ya,» ka Pilat nda həɲ.

⁶ Na gi nghay la mali ta ghəŋa gwal dra skwi ŋa Lazglafta, nda gwal ta ngha həga Lazglafta, «zləŋaftá! zləŋaftá!» ka həŋ hlaftawi. «Klawakla kaghuni ka zləŋafta kuni, kabga slanagha a yu ta skwi dekdek prək ka dzata wu,» ka Pilat nda həŋ.

⁷ «Mamu zlahá ŋni. Ka tsa zlahu ya ná, dzata! ka'a, kabga Lazglafta yu kə'a fatá ghəŋani,» ka la Yahuda zlgħanaftawi.

⁸ Snaŋta Pilat ta tsa gwadá ya, ka ksəglaftá zləŋ katakata,

⁹ Ka lamə tsi da daɓa həga. «Sagha ga ka na?» ka'a dawanta da Yesu. Sew zlgħanaf a Yesu ta wani wa.

¹⁰ «Zlgħa a ka ta wa dá wu? sana a ka kazlay: Laviŋlava yu ta zlighista, laviŋlava yu ta zləŋaftá kagha kə'a wu ra?» ka Pilat nda tsi.

¹¹ «Had sana skwi laviŋ ka ta ghəŋa i'i, ka ya vlagha Lazglafta a tsi wa. Tsaya kəl dmakwa tsa mndu ta vlatá i'i ma dzva gha ya, ka malagħutá ŋa gha dmaku,» ka Yesu nda tsi.

¹² Hada tama, ka zbə Pilat ta tvi ŋa zliŋta. «Ka zliŋzla ka ta tsəna mndu na ná, gra Sezar a ka wa. Ka mgham a i'i ra, ka mndu guli ná, ghuma mgham Sezar tsa mndu ya,» ka la Yahuda.

¹³ Snaŋta Pilat ta tsa gwadaha ya, «kladapwakla ta Yesu dzibil,» ka'a. Ka nzaftá tsi ta vla tsa guma ma sana vli ta hgə lu ka Pave. Tsa Pave ya, Gabasla ta hga lu nda gwadá Hebru.

¹⁴ Mahtsim skala Pak ka lu, ta ghwanə a fitik ma ghəŋ wu, ka Pilat nda la Yahuda mantsa: «Wyawa mghama ghuni,» ka'a.

¹⁵ «ŋa dzatá! ŋa dzatá! Zləŋafta ta udzu» ka həŋ hlaftá wi. «Ka zləŋaghunafta yu ta mghama ghuni ta

udzu?» ka Pilat nda hən. «Had sana mghama nni ta ghəŋa Sezar wu, ka la mali ta ghəŋa gwal dra skwi ŋa Lazglafta.»

¹⁶ Lagha Pilat ka vlanťá hən ta Yesu ŋa zləŋafta ta udzu.

Dalafta la sludzi ta Yesu ta udza zləŋay

Mat 27:32-44, Mak 15:21-32, Luk 23:26-43

Ka tsu'uwaghutá hən ka klaghata.

¹⁷ Ka klə Yesu ta udzu ŋa zləŋa ghəŋani, ka sabi ma huďa luwa ŋa dza'a da sana vli ta hgə lu ka «vla ghudzifa ghəŋ.» «Gwalgwata» ta hga lu ta tsa vli ya nda gwada Hebru.

¹⁸ Ma tsa vli ya zləŋafta hən ta Yesu ta udzu. Ka zlanənavatá hən ta sanlaha ma mnduha his guli tavata Yesu, ma takataka ka hən zləŋamťá Yesu.

¹⁹ Vindafwa vinda ta skwi ka fagata kuni ta ghəŋa tsa udzu ya, ka Pilat. «Yesu mnda la Nazaret mghama la Yahuda,» ka lu vindafta.

²⁰ Nda ndəgha la Yahuda ta dzaŋaftá tsa skwi vindaf lu ya, kabga ndusa nda luwa tsa vli zləŋaf lu ta Yesu ya. Nda gwada Hebru, nda gwada Lateŋ, nda gwada Grek vivindafta lu ta tsa skwi ya.

²¹ «Má vinda a ka kazlay: Mghama la Yahuda kə'a wa. "I'i mghama la Yahuda" ka'a, ka ka má vindafta,» ka la mali ta ghəŋa gwal dra skwi ŋa Lazglafta mataba la Yahuda nda Pilat.

²² «Skwi ghada i'i ta vindafta ná, nda vinda,» ka Pilat zlganaftawani ta hən.

²³ Tahula zləŋafta la sludzi ta Yesu ta udzu, ka hlaftá hən ta lguthani, ka daganapta fwaď ta hən ta hən. Ka klaftá hən ta dzampani ya gaf lu mantša daga ta ghəŋ dikw ta haďik kul haď iri tida ya guli.

24 «Ma kwahanap mu ta na dzampa na, vza-mavza ta vindima ḡa nḡha mndu dza'a zuta,» ka la sludzi mataba hahəḡ hahəḡ. Tsa skwi maga la sludzi ya ná, magamaga həḡ manda skwi nda vinda ma defteri kazlay:

Ka daganaptá həḡ ta lgutha dá,
ka vzə həḡ ta vindima ta ḡhəḡa dzampa* dá kə'a ya,
tsaya skwi maga la sludzi.

25 Ndusa nda tsa vli zləḡaf lu ta Yesu ya, ka sladaktá i mani, nda mukumani ma mani, nda Mari markwa Klupas, nda Mari makwata luwa Magdala.

26 Nḡhay Yesu ta mani, kə'a kə'a ná, wya tsa duhwal ta dṽu tsi ya ta sladu tavatani. Ka'a mantsa: «Ma! Wya zwaḡa ḡha,» ka'a.

27 «Wya ma ḡha!» ka'a nda tsa duhwal ya guli. Daga ma tsa fitik ya, ka klaghatá tsa duhwal ya da taḡ.

Mtakwa Yesu

Mat 27:45-56, Mak 15:33-41, Luk 23:44-49

28 Tahula tsa, manda snəḡta Yesu kazlay: Nda kda inda skwi tama kə'a, «ndala ta kuzlihata†!» ka'a, ḡa nzakwani manda ya nda vinda ma defteri.

29 Tsaw ma tsa vli ya, mamu wuda ima inabi masmasa. Ka sli'aftá sana sludzi ka klaftá susu, ka tsughumamta ma tsa ima inabi masmasa ya, ka hbunḡta ta wa dafa, ka tsghadafta funḡta ta wa wubisima Yesu.

30 «Nda dza ḡhəḡa inda skwi tama,» ka Yesu taparar tsi ta tsa ima inabi masmasa ya. Ka dzagatá tsi ta ḡhəḡ, ka sabə hafu mida.

* 19:24 Nḡha ta Zabura 22:19. † 19:28 Nḡha ta Zabura 22:16, 69:22.

Sliglatá Yesu

³¹ Bađu luma madagala ɲa gi lamə da Sabat magakwa tsa skwi ya. Va a la mali mataba la Yahuda ta slanaghata Sabat ta tsa mnduha ya ta udzu wa. Tsa Sabat ya ná, sana mghama fitik ya. Ka sli'aftá həŋ ka laghwi da daway da Pilat ɲa ɓalanaptá səlaha taŋ ɲa hligintá həŋ ta udzu.

³² Ka lagha la sludzi da ɓalanaptá səlaha tsa mnduha his zlananava lu tavata Yesu ya.

³³ Ta lagha həŋ ta Yesu, kə'a ka həŋ ná, nda ghada mtatani. Ka zlanatá həŋ ta ɓalanaptá səlaha ni.

³⁴ Ka sliglanavatá sani ma tsa sludziha ya ma ɲwazliɓ nda gupani, ka gi mbəzagaptá us nda imi.

³⁵ Tsəna mndu ta vinda na skwiha ta maguta na ná, nda ngha tsatsi nda irani. Kahwathwata gwadani guli. Nda sna tsatsi kazlay: Kahwathwata ta mnə tsatsi kə'a. Mnay ta mnə tsi ná, kada zlgħafta kaghuni guli.

³⁶ Magamaga tsa skwiha ya mantsa, ɲa nzakwani manda ya nda vinda ma defteri kazlay: Had ghudzifani dza'a ɓalanapta‡ lu dər turtuk wu kə'a ya.

³⁷ Ka lu vindafta ma sana vli guli ná, «dza'a nghanavangha həŋ ta tsa mndu sliglanava§ həŋ nda gupa ya» kə'a.

Paɗamtá Yesu

Mat 27:57-61, Mak 15:42-47, Luk 23:50-56

³⁸ Tahula tsa, mamu sana mnda la Arimate ta hgə lu ka Yusufu, ta nzakway ka duhwala Yesu makɗekmakɗek kabga zlanɲa la Yahuda. Ka sli'aftá

‡ 19:36 Ngha ta Sabi 12:46, Mbsak 9:12, Zabura 34:21. § 19:37 Ngha ta Zakari 12:10.

tsi ka laghwi dawaftá mbla Yesu da Pilatus. Ka zlanantá Pilat ta tvi, ka lagha tsi klaghatá tsa mbla Yesu ya.

³⁹ Ka lagha Nikwademu, tsa mndu si ta lagha da slanaghatá Yesu girvidik ya kay. Ka lagha tsi nda klatá labatá urdi ka hpuhpu ta hgə lu ka Mir nda Alwes.

⁴⁰ Ka klaftá həŋ ta mbla Yesu, ka masanavatá rđi ka urdi, ka mbsamtá həŋ ma wupay manda ya snu la Yahuda ta magay ta padə həŋ ta mnda taŋ.

⁴¹ Tsaw ma tsa vli kəl lu ka zləŋafta ya, mamu sana gam. Ma tsa gam ya, mamu kulu ta ka lfid ta kul walaŋta lu ta padamtá mndu mida.

⁴² Ndusa nana, ka həŋ ka padamtá Yesu ma tsa klu ya, kabga tsaya fitik ta kəl la Yahuda ka paya vgha ŋa lami da Sabat.

20

Ta haf Yesu ma kulu wa

Mat 28:1-8, Mak 16:1-8, Luk 24:1-12

¹ Wrək tgha gasərdək bađu dəmas, ta kzau'kzau' a vli, ka lagha Mari makwa ta Magdala ta kulu. Kə'a kə'a ná, taŋwalaghutaŋwala lu ta klam ta wa tsa kulu ya.

² Ka sli'aftá tsi nda hwaya ka laghwi slanaghatá i Simuŋ Piyer nda tsa sana duhwal ta đvu Yesu ya. «Klapkla lu ta mbla Mghama mu ma kulu, sna a ŋni ta vli fam lu wu,» ka'a.

³ Ka sli'aftá i Piyer nda tsa sana duhwal ya, ka laghwi ta kulu.

⁴ Ka sli'aftá həŋ his his nda hwaya. Tsaw mal tsa sana duhwal ya ta hwaya ka Piyer, ka tinlaghutá tsi ta 6hadaghata ta kulu.

⁵ Bhadaghatani má ña lamani, lamə a wa. Ka ɓukwatá tsi ka nghə dida. Kə'a kə'a ná, wupay yeya ksufa ta hadik.

⁶ Ka ɓhadaghatá Simuñ Piyer nda hul nda hul, ka lamə tsi da tsa kulu ya. Kə'a kə'a ná, wupay yeya ksufa ta hadik,

⁷ nda tsa patak si wanam lu ta Yesu ma ghəñ ya. Tsa patak ya ná, ma sana vli tsaya ñusafa guli kawadaga nda tsa wupay ya a wa.

⁸ Ka lamə tsa duhwal si ta ɓhadaghata tañtañ ya kay guli. Ka nghanatá tsatsi guli, ka zlgħaftá tsi.

⁹ Tsaw si ta graf a həñ ta skwi mna defteri kazlay: Dza'a sli'agapsli'a Yesu mataba gwal nda rwa kə'a wa.

¹⁰ Ka vraghutá tsa duhwalha his ya dzagha tañ.

Maranña Yesu ta ghəñani da Mari makwa ta Magdala

Mat 28:9-10, Mak 16:9-11

¹¹ Ka nzaghutá Mari ma bli ta wa tsa kulu ya ka taw. Ta taw tsi ta tsa taw ya ná, ta ɓukwatá tsi ka nghə da tsa kulu ya.

¹² Ka nghanťá tsi ta duhwalha Lazglafta his, ta nzaku ma tsa vla si fatá mbla Yesu ya. Sani nda tvə ghəñ, sani nda tvə səla.

¹³ «Nya ta taw ka ní makwa na?» ka həñ nda tsi. «Mghama dá ya klagħa lu, sna a yu ta vli fam lu wu,» ka'a nda həñ.

¹⁴ Ta mnə tsi ta tsaya, ka mbəɗavatá tsi. Ka nghanťá tsi ta sana mndu ta sladu hada. Tsatsaf a tsatsi kazlay: Yesu ya kə'a wa.

¹⁵ «Nya ta taw ka ní makwa na? Wa ta zbə ka na?» ka Yesu nda tsi. Na mndu nda na gam na ya ka

tsatsi sizlay. «Mghama dá, ka si kagha ta klaghata, mnihamna ta vli fam ka, ka dza'a yu da klay» ka'a.

¹⁶ «Mari!» ka Yesu hgan̄ta, ka mbəḁavatá tsi. «Rabum» ka'a nda tsi. Manda mnay kazlay: Mnda taghadiftá skwi kə'a ya nda gwada Hebru.

¹⁷ «Ma ŋiha ka, ta laf a yu da Da dá karaku wu, la da mnay ŋa zwanama dá kazlay: Ta dza'a da Da dá ta nzakway ka Da ghuni yu, da Lazglafta ta nzakway ka Lazglafta ghuni ya yu guli,» ka Yesu nda tsi.

¹⁸ «Nda ngha yu ta Mgham Yesu,» ka Mari makwata Magdala sli'afta ka laghwi da mnay ŋa duhwalha. Ka rusu tsi ŋa taŋ ta skwi mnana tsi.

Maran̄ta Yesu ta ghəŋani da duhwalhani

Mat 28:16-20, Mak 16:14-18, Luk 24:36-49

¹⁹ Gahawu baḁu va tsa dəmas ya, ka tskavatá tsa duhwalha ya ma həga. Ka ŋərzlaftá həŋ ta watgha kabga ta zləŋay həŋ ta la mali mataba la Yahuda. «Ka nza zdaku kawadaga nda kaghuni,» ka Yesu lami da taba taŋ.

²⁰ Mnatani mantsa ya, ka maran̄ta tsi ta dzvuhani nda ŋwazlibani ta həŋ. Ka rfu tsa duhwalha ya ta rfu nghan̄ər həŋ ta Mgham Yesu.

²¹ «Ka nza zdaku kawadaga nda kaghuni. Manda ya ghunaf Da ta i'i ya, mantsa ya ta ghuna i'i ta kaghuni guli,» ka Yesu nda həŋ guli.

²² Tahula mnatani ta tsaya, «tsu'uwawatsu'uwa ta Sulkum nda ghuḁa,» kə'a vusludanaghatá həŋ.

²³ «Gwal dza'a planata kuni ta dmakuha taŋ, dza'a planapla lu ta dmakuha taŋ. Gwal dza'a kwalaghuta kuni ta planatá dmakuha taŋ, haḁ lu dza'a planatá dmakuha taŋ guli wa,» ka'a.

Maran̄ta Yesu ta ghəṇani da Tuma

24 Tsaw haɗ Tuma ta nzakway ka mbuhwali tekwa mataba tsa duhwalha ya hada ta lagha Yesu wa.

25 «Nda ngha ṇni ta Mghama mu Yesu,» ka tsa pɗakwa duhwalha ya nda tsi. «Ka ngha a yu ta mivida pusa ta dzvuhani, ka ksaṇta da nda ndəfiṇa da ta vla tsa pusaha ya, ksaṇha yu guli nda dzva da ta ṇwazliḅani wu, haɗ yu ta zlghafta dekdək wa,» ka Tuma nda həṇ.

26 Tghas fitik tahula tsa, ka nzəglatá duhwalha Yesu ma həga, kawadaga Tuma nda həṇ baɗu tsa. Ka ṇərzlaftá həṇ ta watgha. Ka lamə Yesu da taba taṇ. «Ka nza zdaku kawadaga nda kaghuni,» ka'a nda həṇ.

27 «Wya dzvuha da ksaṇksa nda ndəfiṇa gha, wya ṇwazliḅa da guli, ksaṇksa nda dzva gha, ka zlaṇta ka ta dga ghəṇ, ka zlghafta ka nda ṇuɗuf,» ka'a nda Tuma.

28 «Kagha ta nzakway ka Mghama da, kagha ta nzakway ka Lazglafta da guli,» ka Tuma zlghanaftawi.

29 «Zlray gha ta zlghaftá tsa ba kabga nghan̄ta gha ta i'i? Rfu da gwal ta zlghaftá i'i, kul nghan̄tá həṇ ta i'i,» ka Yesu nda tsi.

Kabgawu kəl lu ka vindaftá na defteri na?

30 Ta traku mazəmzəm magəgla Yesu ta kəma duhwalhani kul vindaku ma na defteri na.

31 Nana vinda a lu na ná, vinda a vinda lu ṇa zlghafta ghuni kazlay: Yesu ná, Kristi ya, Zwaṇa Lazglafta ya guli kə'a. Ka zlghafzlgħa kuni ta tsatsi, dza'a mutsay kuni ta hafu nda ma tsatsi.

21

Maranĵa Yesu ta ghəŋani da duhwalhani

¹ Tsəbəkŋ fitik tahula tsa, ka marglavatá Yesu da duhwalhani ta wa drəfa Tiberyad. Wya kə'a maravata:

² Ta nzaku i Simuŋ Piyer nda Tuma ta hgə lu ka mbuhwali ya, nda Natanayel mnda luwa la Kana ta hadika Galili, nda zwana Zebedi, nda sanlaha ma duhwalhani his, ka skwa turtuk.

³ «Dza'a tuma klipa da yu,» ka Simuŋ Piyer nda həŋ. «Nda sli'a anŋi mista gha guli,» ka hahəŋ guli nda tsi. Ka sli'aftá həŋ ka laghwí, ka lamə həŋ da kwambalu. Kurzliŋ hana taŋ ndiri bađu tsa, ksaf a həŋ ta klipi dər ka turtuk wa.

⁴ Tsadəkwa vli gasərdək, ka lagha Yesu sladata ta wa tsa drəf ya. Tsəmaf a duhwalhani kazlay: Tsatsi ya kə'a wa.

⁵ «Mamu klipi ksaf kuni ri zwani?» ka Yesu nda həŋ. «Had wu,» ka həŋ nda tsi.

⁶ «Wudadawa kadəŋa ghuni ta slərpa kwambalu nda ga zeghwí ya, dza'a mutsay kuni,» ka'a nda həŋ. Ka wudadatá həŋ. Ka traptá həŋ ta tđagafťa kabga ndəghatani nda klipi.

⁷ «Mgham Yesu ya tane, ka tsa duhwal ta đvu Yesu ya,» nda Piyer. Na tsa gi snanĵa Simuŋ Piyer kazlay: Mgham Yesu ya kə'a ya, ka favatá tsi ta lgutani kabga si sudíŋsuda ka tuma klipi, ka vzadatá tsi ta vgha da drəf.

⁸ Ka vragaghutá tsa sanlaha ma tsa duhwalha ya ma kwambalu, nda tđa tsa kadəŋ nda ndəghatani nda klipi ya. Si di'inĵaghu a həŋ katakata wa. Ka mitir dərmaq yeya ri kaki nzakwa taŋ nda wa sgam.

⁹ Ta sli'agaptá həŋ ma kwambalu, kə'a ka həŋ ná, mamu tsatá vu hada nda klipi tida nda buradi.

¹⁰ «Kligiswakla ta tsa klipiha kasaf kuni ya,» ka Yesu nda həŋ.

¹¹ Ka lamə Simuŋ Piyer da kwambalu, ka tɔagaptá tsi dzibil ta tsa kadəŋ nda ndəghatani nda klipi bərzləzla ya. Dərmək nda hutaf mbsak hkən mida gwagwatani. Kulam nda va tsa nzakwani mantsa ya ná, ratsanap a ta tsa kadəŋ ya wa.

¹² «Sawa da za skwa zay!» ka Yesu nda həŋ. Had' ya mataba tsa duhwalha ya ta walaŋtá dawəŋta kazlay: Wa kagha na kə'a wu, kabga nda sna həŋ kazlay: Mgham Yesu ya kə'a.

¹³ Ka lagha Yesu klaftá tsa buradi ya, ka daganaftá həŋ, daganafha ta klipi ta həŋ guli.

¹⁴ Mahkəna maravata Yesu tsaya da duhwalhani manda sli'agaptani nda hafu mataba gwal nda rwa.

I Yesu nda Piyer

¹⁵ Tahula zuta taŋ ta skwa zay, ka Yesu mantsa: «Simuŋ zwaŋa Yuhwana! Dvuɔva ka ta i'i, ka malaghutá ŋa nanaha na ra?» ka'a dawəŋta da Simuŋ Piyer. «Aŋi Mghama ɔa, nda sna kagha kazlay: Ta ɔvay yu ta kagha kə'a,» ka'a zlganaftá wani. «Ka ŋha ka ta zwana tuwakha ɔa,» ka Yesu nda tsi.

¹⁶ «Simuŋ zwaŋa Yuhwana! Dvuɔva ka ta i'i?» ka Yesu nda tsi kamahis. «Aŋi Mghama ɔa! Nda sna kagha kazlay: Ta ɔvay yu ta kagha» kə'a, ka Piyer nda tsi. «Ka ŋha ka ta tuwakha ɔa,» ka Yesu nda tsi.

¹⁷ «Simuŋ zwaŋa Yuhwana! Ta ɔvay ka ta i'i?» ka'a nda tsi ka mahkən. Ka kuzlanaftá tsi ta Piyer

ta ɲuɖuf na tsa ɗaway Yesu ka mahkən kazlay: Ta ɗvay ka ta i'i ra kə'a ya. «Mghama ɗa, nda sna kagha ta inda skwi, nda sna kagha guli kazlay: Ta ɗvay yu ta kagha kə'a,» ka'a nda tsi. «Ka ngaha ka ta tuwakha ɗa,» ka Yesu nda tsi.

¹⁸ «Kahwathwata ka yu ta mnaghata, ma fitika nzakwa gha ka duhwal, kagha ka ghəŋa gha ta hba ɓanava gha misti, ka dza'a gha da vli ta kumə ka. Ka hwaluhwala ka, dza'a pghapgha ka ta dzvuha gha ŋa nzɗaghafta sana mndu ta ɓanava gha, ka kla kagha da vli kul kumə ka ta dza'a,» ka'a.

¹⁹ Tsa gwadaha mnə tsi ya, tvi ka Piyer dza'a mtaku ŋa vla glaku ŋa Lazglafɗa ya mnə tsi. «Mbada mista ɗa,» ka'a nda tsi tahula tsa.

I Yesu nda sana duhwal ya ɗvu tsi

²⁰ Kə'a ka Piyer mbəɗavata ná, ta saghasa tsa duhwal ɗvu Yesu ya mista taŋ. Tsatsi tsa duhwal ta fadaghatá ghəŋ da ghuva Yesu, ma fitika nzata taŋ ka za skwa zay, ka ɗaw tsi kazlay: Mghama ɗa! Wa va na mndu dza'a skwaptá kagha na na? kə'a yeya.

²¹ «A ki na duhwal na tama Mghama ɗa, nahgani dza'a slanaghatá tsatsi?» ka Simuŋ Piyer nda Yesu, nghər tsi ta sagha tsa duhwal ya.

²² «Ka nzanza nda hafu ha ka vrakta ɗa, ka yu nda tsi ní, nu ta nghaghata mida na? Sli'a kagha mista ɗa ŋa gha ɓa,» ka Yesu nda tsi.

²³ Ka tutá tsa gwada ya mataba gwal zlgħay nda ɲuɖuf kazlay: Mtəta a tsa duhwal ya wu kə'a. Mtəta a wa a mna Yesu ŋa Piyer wa. Wya kə'a mnay: «Ka nzanza nda hafu ta vragatá yu, a ka ka yu nda tsi ní, nu ta nghaghata mida na» kə'a skwi mna tsi.

²⁴ Va na duhwal ta mna na gwadaha na ta vindafta. Nda sna mu guli kazlay: Kahwathwata gwadani ka'a.

Dzata ghəŋa gwada

²⁵ Nda ndəgha sanlaha ma skwiha magəgla Yesu. Ka má ka vivindaf vivinda lu ta indani ká lu katsi ná, graf a yu kazlay: Má dza'a ŋafŋa ghəŋa hadik ta tsa defteriha má dza'a vivindafta lu ya ka'a wa.

Deftera Lfiḍa Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

f257b780-c0dd-5cce-9b20-430484439898